

MATEYON DADA UAID

*Esuquidistun tsusedpabotedi chiaid
(Duc 3.23-38)*

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. ³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. ⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid

cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. ⁸ Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. ⁹ Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. ¹⁰ Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. ¹¹ Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

¹² Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic. ¹³ Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. ¹⁴ Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. ¹⁵ Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. ¹⁶ Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

17 Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuiioquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuiioquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid
(Duc 2.1-7)

18 Nëbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. 19 Usundoacsho isun abi inuequidën Osen dada utsin chudaïd danec: –“Nëbi mibi bedtiapimbo iquebi,” quequin bedenquio icnuen dada uashun Madia menenu –queuidpac caondash. Nuquin Papan chiacpadquio bëdambo icquid icquin naden chiambo icpac caondash. –Bedabi bacuë usundoaque. Cuidquimbien ictiad –quequin aton matses chienquio yequi: –Bedenquio icnuen dada uaid menenu –queuidpac caondash.

20 Adnubien Nuquin Papan abi yacnoshon uaidën mayan bëdan Ose ushquin ismepac caondash. –Dabid yampidën tsyuecquid icsho mibi chuinu, Ose. Tantia. Chudenquio icquin Nuquin Papan Mayanën Madia bacuë usundomiaye. Dacuëdenda. Dacuëdenquio icquin Madia min shubuno buanta. 21 Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses

cuidmenquio iquendac,” quequin Esus cuënta —quequin mayan bēdan Ose ushquin ismepac caondash.

²² Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidēmbi bacuë usundoshon dada bacuë tishendac.

Aidi Imanued cuēnendac.

‘Nuquin Papapadquidquibidi matsesbēd tabadnuec choash nec,’ quequin Imanued cuēnendac,”

quequin Esus tishte Nuquin Papan dada uamepampic.

²⁴ Aden mayan bēdan chiac isucunshumbien aidēn chiacpadomboen Osen aton shubuno Madia buampac caondash. ²⁵ Buanshun Osen chudenquio icnubi dada bacuë tishpac caondash. Tishacsho Esus cuēmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daēdpactsēcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin ² anocquido chuituidpac caondash. — Min matses isadaidbo chuiquid dapa ictequidquio nēbi tishtsaidēmpi ¿midambo ictseque? Isnu. Aid tishaid tantiamete uispa isombique. ¿Mitsimbo

ictseque? Isnu. “Chuiquid dapa bēdamboshē ictequid nec,” quiash aid isnuec chopobi—quetuidpac caondash.

³ Adsho tantiash dachuēdcuededpac caondash abitedimbo. —Padtec. ¿Midapadquid bacuē nependabac? —quecuededpac caondash Edodes isadaidbo ancaquid ambi ancaidobēdi.

⁴ Adshumbien Edodesēn abi yacno tsusiobo cho-chomepac caondash. —¿Mitsicquid caique? Tantuanu —qeshun abi yacno Moisesēn dada uampid chuibanquido abi chuiquid dapabobēdta cho-chomeshumbic: —¿Mitsishunquio Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: ⁵ —Ai, tantiemi. “Nidaid Udeya caid yacno tabadquin shubu daēdpactsēcquid Beden caid yacnoshon aid bacuē tishendac,” quiampicpademi tantiemi. Nuquin Papan ambi chiaid nuquin tsusedpa dada uamepampic naden. ⁶ Shubu daēdpactsēcquid Beden caid yacnocquido chiec:

“Beden yacno tabadec nidaid Udeya caidēn tabadquido mibi nec.

‘Chuiquid dapa nibēdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidēmi isadaidbo matses chuiquid dapa icquin bēdamboen tabadmendac,”
—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesën ambi ancaido isadaidbo ismenquïo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantianu —cac chuisho ⁸ tantiashun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec niduntpac caondash: —Bacuë ictsaid shubu nëid iquec —quec. ¹⁰ Adsho isashien cuishonquepac caondash uispa isquido. ¹¹ Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidtedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanda —quequin ushquin ismiac isucunanec abi choboedën nidenquïo yec podqued utsin nidpac

caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puđuanec aton bacuë anibëdta buanec nidaid utsi Equipito caid yacno Ose nidpac caondash. ¹⁵ Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindambi,’ quiosh Nuquin Papa,” quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuiyac caondash. —Uispa isquidon chuibocpadtsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac

caondash. ¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ “Abi yacnuësh aton bacuëbo nibëdansho isash isadaidbon chidobo sedenquecuededen-dac.

Unësaid tantiec baded ënëdenquio yec sedenquebudnendac,”

quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. ²⁰ —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien ²¹ isucunanec aidën chuibocno buanuec nidpac caondash.

²² Aton nidaidën nidshun aton matsesën chiaid tantipac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquiobidien nechitec —quesho tantishien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushe. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. ²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,”

quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

*Uan acten mentoanquidën chuibeniaid
(Mad 1.1-8; Duc 3.1-9, 15-17; Uan 1.19-28)*

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. ² Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. ³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi

nacnenaid tsiupondash. Aton pete bacumböd sh-
ioshbimboecquid icpondash. ⁵ Aidën Nuquin Pa-
pan chiaid chuibenesho tantianuec nēidtedi mat-
ses cho-chopac caondash. Nēidic shubu dad-
pen icquid Edusaden caid yacnocquido. Nēidic
nidaid Udeya caid yacnocquido. Nēidic acte Odan
caid cuēman tabadquido. Aidedi cho-chopac
caondash. ⁶ Cho-choshon Uanën chuisho tan-
tiash: —Nuquin Papan chiaid niac-niaquec ic-
sapobi. Icsaboedi aid tantiec bēdamboec tabadti-
adquio iquebi —quesho: —“Nēid Nuquin Papa tan-
titanu,” quequid nec —quequin acte Odan caidën
mentopac caondash Uanën.

⁷ Adnubien padiseyoboböd saduseyobo
Uan isec cho-chopac caondash. Padiseyobo
isadaidbo tsusedpabon chiaid namequido nec.
Saduseyobobic: —Matses unēsaid uincuenenquo
iquendac —quequido nec. Aido cho-chosho isun
Uanën: —Nisibimboecquido mibi nec. Adquidën
icsa uacbimboen matses icsa uaquido mibi
nec. Bēdambo icquid damianquiec mibi iquec.
“Nuquin Papan mibi cuidnushe. Tantiatan,”
quequin ¿tsuntsin chiac cho? ⁸ Mentomete bunec
Nuquin Papan chiaid niac-niacboedi ēnash
bēdamboec tabadta. ⁹ “Ēbipadquid Abadauanën
tsyuecquidouditsēqui Nuquin Papan bēdamboen
isec,” quequin tantienda. ¿Adquidta Nuquin
Papan bēdamboen ispec? Abadauampadquid
abi tantiaquidien Nuquin Papan bēdamboen
isec. Mimbi bēdamboen tantiatiapimbo icsho
isun nēid cuēnotebi matses uashun Nuquin
Papan Abadauampadquid abi tantiaquidombo
icmetsiash icnushe. Nuquin Papambo tantiata.

¹⁰ “Icsambo icquid nec,” queshun ambi nitsinaid cuëte bacuëesa dëdshun nëdëncacimboen ambi chiacpadomboen naisa Nuquin Papan cuidendac –quepac caondash Uan padiseyobo saduseyobobëdta chiec.

¹¹ Adshumbic padpiden chuiquin Esusën nate chuipac caondash. –Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Èbi bëdiactsëc tantiaquid ictsëcnuc aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc ¿atotsieshun icsaquidquiobi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Èmbi chuiboed choshon: “Èbi tantiaquid nec,” queshun aton Mayan menequin bëdamboec tabadte mibi tantiamendac. Abi tantiesaboen cuidendac. ¹² Piacbo choeshashun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac –quepac caondash Uan acten mentoanquid.

Uanën Esus mentoaid
(*Mad 1.9-11; Duc 3.21-22; Uan 1.32-34*)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: –Èbitsen mento –quetuidpac caondash. ¹⁴ Adshobien Uanën: –Padenquio iquemi. Nuquin Papan chomiaid icquin mimbibi ëbi naquien bëdambo ictsias. ¿Atotsieshun ëbi aden chie? Padi –queshobien: ¹⁵ –En na. Bëdambo

iquec. Ēbi mentoquin mimbi Nuquin Papan chiacpadomboen natsiaque. Ēbi acten mento —quesho tantiashun Esus acten mentopac caondash Uanën.

¹⁶ Adoac Esus pudundonobien canchedac bimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec. ¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Ēmbi chiacpadomboen nasho isash bëdambo iquebi —quepac caondash Esus caic.

4

Satanasën Esus icsamenuequin tanuidaid (Mad 1.12-13; Duc 4.1-13)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanasën Esus icsamenuequin ma tanu —quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnuc 40tedec ushquin penquio yec comapenec bumpac caondash. ³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien ⁴ Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bëdamboec tabadpec? Nuquin

Papan chiacpadomboenuidi naiquien matses bēdamboec tabadtsiash,” quequin dada uapampid iquec —quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasēn Esus manidtomepac caondash abucquio.

⁶ Adotanquimbien padpiden chuiquin: — ¿Nuquin Papa caidēn Madombobida mibi neque? Aidēn Mado yec nēuēshquio pudunta. Nuquin Papan mibi paēdmenquio ictsiashe. Nadentsen Nuquin Papan chiaid dada uapampic.

“‘Uidēn uata,’ quequin ambi abi yacnoshon uaido mayan bēdabo Nuquin Papan chiac mibi uidēn uaindac paēdenquio icnuc.

‘Cuēnoten tadquēdnushe,’ queshun adoendac,” quequin Nuquin Papan chiaid dada uapampique. Pudunta —caquien ⁷ Esus: —Padi. Nuquin Papan chiaid dada uapampid nad iquec. “ ‘¿Ic-samboen tantiaquin ěmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoaquien Satanasēn padpiden buanquin macuēsh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobēd icquido ismequinc aidon dayun uaidtedi ismequinc capac caondash. ⁹ Adoshombic: —Nēidtedi mibi menetsiambique. Ēbi con icbo cata. Ēbi aden chuiquin ismenuen danēshēn sebudta. Adsho isun ěmbi ismiactedi mibi menembi. Aidēn icbo mibi icmembi —caquien ¹⁰ Esusēn: —Padi. Baded cuenta. Nuquin Papan chiaidquio

chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta — capac caondash Esusën. ¹¹ Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bédambo icmpac caondash.

*Cadidia yacnoshon Esusën chuibeniaid
(Mad 1.14-15; Duc 4.14-15)*

¹² Adashic aton nidaid Cadidia caidën Esus nidpac caondash. —Mibi acten mentonaid Uan bedshun quënën nauedac caosh —quesho tantiash nidpac caondash. ¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëmëman tabadquidon.

Nëidic isadaidpembo dadpen tabadacno Cadidia caidën tabadquidon.

16 Aidtedishun Nuquin Papan chomiaid tantien-dac.

Pabiate cuënédacimboec icsamboec tabadquin Nuquin Papa tantienquo icboedombi tantiabenendac.

Nuquin Papa tantiamenuen chuibansho tantiashun matsesën pashquiacimboen Nuquin Papa tantiabenendac.

Abi tantienquo icscho Nuquin Papan cuidtse-
naidombi Nuquin Papa tantiabenendac
ushash isucunacimboen,”

quequin Isayas Esus choash tabadte dada uamepampic Nuquin Papan.

17 Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bédamboec tabadta. Nēbi Nuquin Papan abēd tabadtequido icmequin matses bédamboen tabadmendac —quepac caondash Esus ambibi naid chiequi.

*Nuëcquid bedquido Esusën: Cho, caid
(Mad 1.16-20; Duc 5.1-11)*

18 Aden chuibenec chian dapa Cadidia caid cuëman nidquin isquien dadan aton utsibëdtambi nēshaid dapambo acte nēnepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nēshaid acte nēnesho istuidpac caondash Esusën.

19 Adshumbien Esusën: —Nuquiobi icnu. Cho. Nuëcquid bedquid icboedi nēbi ëbi chuibanquid mibi icmenu ²⁰ —caquien aton nēshaid nianec nidquimbi Esus tsibanampac caondash.

²¹ Udichtsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Mates dadpen Esusën chuibeniaid
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste mates chuibeniac caondash. Adshumbic daicsaidotedi bëdamebampac caondash. ²⁴ Adosho istanquin: —Bëdamequidquio nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniac caondash. Aden chiac daicsaidotedi bë-bëpac caondash. Dada paëmboshë icquido yec podobitsi icsa dapuduedaido yec unësanequido yec dada shëquëquenquio icquido yec quenuc bë-bëacsho aitedi bëdamepac caondash Esusën. ²⁵ Aden: —Bëdamiosh —quequin chiac isec cho-choash dadpenquio tsucus-tsucustsëcquio yec tsidadash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnocquidon. Nëidic nidaid Udeya caidën tabadquidon. Nëidic acte Odan

caid uquë cuëma utsiuc tabadquidon. Aidedshun
Esus tsibanampac caondash.

5

*Nadquido bëdambo iquendac, quequin Esusën
chiaid
(Duc 6.20-23)*

¹ Matses dadpenshun tsibananac macuësh dapa
cuëte nibëdpamboecquid pudundoec poctsebi Esus
tsadtuidpondash. Abi tsibananash matses dad-
pen abi datsidadnubien abëd icquido Esusën
dayunquio tabadpondash. ² Adshobien Nuquin
Papan matses bëdamboen isquin bëdambo icmete
Esusën matses abitedi chuibampondash.

³ —¿Mitsipadquid Nuquin Papan bëdambo
icmepec? Nadquid caimbique. Tantia. Mibitedi
chuinu. “Ëbembi bëdamboec tabadtiapimbo iquebi.
Bëdapenquio iquebi. Nuquin Papan bëdamboen
tabadmiaquini bëdamboec tabadtsiac,” quequid
Nuquin Papan: “Ëbëd tabadtequid nec,” quequin
bëdambo icmendac.

⁴ “Matses abitedi icsamboec tabadnuc ëbitsen
icsamboec tabadquid nebi,” quec shubiquimbi
abi tantiaشو Nuquin Papan bëdamboen isquin
bëdambo icmendac.

⁵ Aton nauidi tantienquio icquin Nuquin Papa
tantiaquin utsibotsen tantiaquid Nuquin Papan
bëdambo icmendac. Yuecshun ambi nidaid chuca
uaidën tabadmendac.

⁶ Pete bunacimboec ambi chiacpadec
bëdamboec tabadte bunquid Nuquin Papan
bëdamboen tabadmendac.

⁷ Abi chieshënquidi chieshënenquo icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënansho isash: “Padi. Chën. Bëdamboequien tabadiad,” quequid Nuquin Papan bëdambo icmequin con mado caindac. Adquidbidi adembidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unësacsho abëdi tabadmendac. ¹¹ “Esus tantiaquid nec,” qeshun utsin mibi chieshënquin chiacsho Nuquin Papan abëd tabadmenuen mibi bëdambo icmendac. Mibi cueso adembidi mibi bëdambo icmendac. Adembidi mibi muauasho Nuquin Papan mibi bëdambo icmendac. ¹² Aden utsibon: “Esus tantiaquid nec,” qeshun chieshënaqui cuishonqueta. “Ënden tsusedpabon Nuquin Papan chiaid chuisho chieshënquin cunesunepampic. Adoacsho Nuquin Papan bëdamboen isquin abëdi tabadmec. Adembidi utsibon chieshënacsho ëbi bëdamboen isquin unësacsho abëdi tabadmendac,” quiash cuishonqueta –quequin chuipondash Esusën.

*Abi tantiaquido bëdamboec tabadte chiaid
(Mad 9.50; Duc 14.34-35)*

¹³ Abi macuësh dapa poctse tsadquin Esusën chuibampondash. –“Ma utsibontsen Nuquin Papa tantianu,” quec sa pambid casecac batambo yec petiadquo yacbimboec icta. Aden Nuquin Papan chiacpadec bëdamboec tabadquin mimbi

utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquo yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquo icquin secatequid nec. Adembidi matses bēdamboec tabadenquo yec icsambo icsho Nuquin Papan chian anēdēnquiacno nēsecatequid nendac –quepondash Esus.

¹⁴ Adashic padpidec onquec: –Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntanshunda ēapadic? Padenquo. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquo yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. ¹⁵ ¿Utsibo chuinecta abentsēqui uano icpadic? Padenquo. “Ma nēidēn tantianu,” quec aidbēdi bēdamboec tabadquin chuibanquid. ¹⁶ Adembidi ēbi tantiesabobēd tabadquin: “Ma Nuquin Papa tantianu,” quequin ēnenquo icquin Nuquin Papan chiacpadomboen nata. “ ‘Nuquin Papa bēdambo iquec,’ ma utsibotsen quenu,” queshun adota –quequin Esusēn chuipondash.

Nuquin Papan Moises chuimaid chiaid

¹⁷ Nadentsen Esusēn chuipondash. –Ēmbi chuibansho tantiashun: “Nuquin Papan chiaidquo chienquo iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquo icquin utsi uapec,” mimbi ēbi capec. Mambi

utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. ¹⁸ Abimbo chuinu. Tantia. Abubēdta nidaid nibēdamiabi icnuc Nuquin Papan chiaid bēnudtiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsēqui niacquin aid chiaid-bidi adomboembidi niacmequid Nuquin Papan: “Bēdambo icquid nec,” catiapimbo iquēc. Utsibic Nuquin Papan chiapadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac. ²⁰ Moisesēn dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adem-bidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

Chieshēmēnquido nēish bēdante chiaid
(Duc 12.57-59)

²¹ Adshumbic Esusēn padpiden chuoapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiapadomboen matses cuidte chuiquidēn cuesunemequin cuidquid,” quequin chuipampid mimbi tantiec. ²² “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquio icsho

Nuquin Papan cuidtequido nendac. Utsibic chieshëmë nec icsamboec cuëmënquido isadaidbo tsusiobon cuidacsho isun: “Bëdamboen naic,” catsiambi. Nëidic aton matses chieshënquin shëpiaquid Nuquin Papan icsano nësecaquin cuidtequido nendac. ²³ “Chieshëmënquid Nuquin Papan cuidtequid nendac,” quequin ëmbi chuisho tantiashun bëdamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mibi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. ²⁴ Adshun: “Ai, ëmbi chieshëmeboed iquec,” qeshun Nuquin Papa tantiaquin mibi bëboed meniabi mibëd chieshënamboed yacno nidash aidbëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bëdamboec onqueta.

²⁵ Mibëd chieshënamboed utsimbic: “Nëid cuidmënen cuidte chuiquid yacno buanchitëmbimbi iquec,” qeshun: “Baded nid,” cac podquedën nidec aidbëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiated piucquid ëmbi bedabi icnuc ma tsadpanu,” mibi catsiash. Quënën nauedshun ²⁶ ambi chiated piucquid nibëdnuc mibi cuemenquio ictsiashe. Mibëd chieshënamboedbëdi bëdamboec onqueta.

“Nuquin Papan adembidi cuidnushe,” quiaſh adta —quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. — Chiaid utsitsen mimbi tantiec. “Min chidopenquoio chudenda. Min bënëpenquoio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niacniaquec icsambo icquid icnubi nadquid icsambo icoaic. Aton chidopenquoio isec: “Aidquoio chudtiadquoio icchitebi,” quequin otacquoio tantiequi matses icsapec. ²⁹ Ĕshën isec mibi min chidopenquoio bunec icsaic. Ĕshë chicshuniacbinboec icsainquoio yec ënëdash mibi bëdambo ictsiac. Icsaid ënenquoio icquid Nuquin Papan chian anëdënquiacono nësecaquin cuidendac. ³⁰ Min chidopenquoio chudte bunquin mëismec mibi icsaic. Mëteshuniac bedtiapimbo yacbimboen mibi icsaid ënta. Ĕnenquoio icquid Nuquin Papan cuidendac — quequin Esusën chuipondash.

Aton chidobëd cuëshëdte chiaid

(Mat 19.3-9; Mad 10.11-12; Duc 16.18)

³¹ Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquoio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³² Utsitsen chuinu. Aton chidon bënëpenquoio chudmesho istuidshun Moisesën chiacpadomboen nac bëdambo ictsiash. Aton

chido dada utsi chudmesa icshobi dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash — quepondash Esus.

Abimbo chiacbimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “ ‘Nuquin Papa utsi uatiapimbo yacbimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. ³⁴⁻³⁶ Aidën chiacpadec muainquo ictiadquidi mimbi abimbo chiacbimboen utsi uain icsamboen chiec. “Abi cuëmédquid cuënec muasho ëbi cuidtsiash. Nuquin Papa cuëmédquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacbimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacbimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacbimboen chienda. “Nuquin Papa cuëmédquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedi? Padenquo. ¿Mimbida min

mapi masedcamedi? Padenquoio. Aton Icbombien Nuquin Papan naique. Abimbo chiacbimboen icsamboen chienda. ³⁷ Adec muainquoio icquin abimbo chuita. “Ai, adembi naimbi,” quequin mimbi chiacpadomboen nata muainquoio icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidèn Satanasèn tantiamiacpadec mibi muapeque. Adenda –quepondash Esus.

Chieshēnec cuidnanenda, quiaid
(Duc 6.29-30)

³⁸ Adashic padpidec Esus onquec: –Nuquin Papan Moises chuiquin dada uamiampid mimbi tantiaboed nad iquec. “Chieshēnquin èshè ansiac adecbidi cuidnanec èshè ansenanquid. Chieshēnquin sēcsiac adecbidi cuidnanec sēcsenanquid,” quequin chiaid icnuc ³⁹ utsitsen chuinu. Tantia. Mibi cuesquid cuidenda. Chieshēnaqui cuidnanenquoio icquin adembi bēdamboen ista. ⁴⁰ Min matses: “Èbi cuidquin mimbi èbi meniambo iqueque. Min dashcute beccho,” qesho mimbi menenquoio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bēdamboec tabadta. ⁴¹ Utsibic: “Nēbi nidtuidquin con na buanec nid,” quequin ancabudac nēbi nidtuidenquoio icquin udimbo buanshunta. ⁴² Aton na nibēdquid: “Mitsana beccho,” qesho meneta. Utsibic: “Mitsana buanshun bēuaindami,” qesho: “Padi,” cainda. Meneta. Aden bēdamboen nata –quepondash Esus.

*Chieshënquidobi bēdamboen iste chiaid
(Duc 6.27-28, 32-36)*

⁴³ Adshumbic abi macuësh dapa poctse tsadquin bēdamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënquido chieshënta,” quequin chuiampic. ⁴⁴ Utsi mibi chuinu. Tantia. Mibi chieshënquidobi bēdamboen isquin tantiaata. Chieshënaqui: “Èbi chieshënquid bēdamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnoudida Nuquin Papan ushë chëncamepadic? Padenquio. Icsaido yacnotsen ushë chëncamec. ¿Bēdambo icquido yacnoudida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. ⁴⁶ ¿Mibēd tantiananquido min shubun icquidoudi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumënquido icquimbi aton shubun icquidoudi nashuntsiashe. Aden nainda. Utsibotsen bēdamboen nashunta. ⁴⁷ ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. ⁴⁸ Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomboen utsibotsen bēdamboen tantiaata —quepondash

Esus.

6

Utsibo bēdamboen nashunte chiaid

¹ Adshumbic abi macuësh dapa poctse tsadquin Esusën chuipondash. —Nadquid icsambo iquec. Nuquin Papa tantienquoio icquimbi aton matses ismenuenuidi naic icsambo iquec. Adquid Nuquin Papan bēdamboen istiapimbo iqueque. “Utsibo nashunu,” quequin utsibo ismenquoio icquin nata. ² “Aton na nibēdquido menenu,” qeshun utsibo ismequin menenda. Ismenquoio icquin meniac bēdambo ictsiash. “Nuquin Papa tantiaquid nebi,” quec muaquidēn nacpaden nainda. Nuquin Papa tantiaquid damenuembien muaquidēn matses dadpen yacnoshonuidi menedenepec. Adosho isun aton matsesēnuidi bēdamboen isnubi Nuquin Papan bēdamboen istiapimbo iquec. ³ Aton na nibēdquido menequin utsibo ismenda. Meneshun: “Menebanombi,” quequin utsibo chienda. ⁴ Adsho isun mimbi utsibo ismenquoio icquin naid tantiaquid icquin Nuquin Papan bēdamboen isquin abēdi mibi tabadmendac —quequin Esusën chuipondash.

Nuquin Papa chianete Esusën chiaid (Duc 11.2-4)

⁵ Adshumbic Nuquin Papa chianetetsen Esusën chuipondash naden. —Bēdambo icquid damianquidēn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidothon comapenec onquequin Nuquin Papa chianepec. Adash umanuc

pduenshun matses dadpen ismenuenuidi padpiden adembidi chianec. Adquid aton matsesën: “Bëdambo iquec,” canubi Nuquin Papan padenquio iquec. Bëdamboen istiapimbo iquendac. ⁶ Mibi adenda. Utsibo ismenuenuidi nainquio icquin matsesën isacmaidquio Nuquin Papambo tantiaquioquin chianeta. Aden chianequid mibi icsho Nuquin Papan mimbi utsibo ismenquio icquin naidtedi tantiaquid icquin mibi bëdamboen isquin abëdi tabadmendac.

⁷ Nuquin Papa chuiquin bëdamboen chianeta. Nuquin Papa tantiesabon ambi tantiaid chuibudacbimboen Nuquin Papa chuibudenda. “Yuenquio chuibudac nuqui tantiaboedën nuqui nashuntsiash. Padenquio icac nuqui nashunenquio ictsiash,” queshun Nuquin Papa tantiesabon yuen chuibudacbimboen nainda. ⁸ Adoenquio icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsiabi,” quequin mimbi otacquoio tantiaid Nuquin Papan tantieque. ⁹ Naden Nuquin Papa chuita.

“Bëdamboshë icquid icsho matses abitedishunquio mibi tantiapashun, Papa.

¹⁰ Matses abitedishunquio mibi con Icho capashun. Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi mimbi chiacpadomboen matses abitedishunquio napashun.

¹¹ Bumianenda, Papa. Badiadquidën badiadquidënnuquin con pete icmeta.

12 Utsibon chieshënaqui ëbi cuidnanenquio icsho isun ëbi icsashobi cuidenquio icquin ëbi bëdamboen ista, Papa.

13 Mimbi chiaid ëbi niacmenda, Papa.

‘Icsamenushe,’ qeshun Satanash ëbi yuamenda, Papa.

Abitedishun Icbombo yec abitedimbo namequidquio mibi nec, Papa.

Ëmbi mibi chuisho tantiata, Papa.

Ënenquio icquin abitedishunquio: ‘Bëdambo iquec,’ mibi capashun. Padi,”

quequin Nuquin Papa chianeta —quequin Esusën chuipondash.

14 Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquio icsho isun Nuquin Papan mibi cuidenquio icquin bëdamboen istsiash.

15 Cuidnanec chieshënanensho isun Nuquin Papan mibi bëdamboen istiapimbo ictsiash —uequin Esusën chuipondash.

Buna mëmunte chiaid

16 Adshumbic utsibo ismenquio icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nachimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquio iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. ¹⁷ “Nuquin Papauidi tantiaquin nëidtedec ushquin buna

mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. ¹⁸ Aden bëdamboen manëdaid shueshcaid isun: “Buna mëmunec nec,” cainquo ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenuquo icquin naidtedi tantiaquid icquin abëdi mibi tabadmendac — quequin chuipondash Esusën.

*Nuquin Papa yacno tabadte bunta, quiaid
(Duc 12.34)*

¹⁹ Adshumbic padpiden Esusën chuipondash. —Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. ²⁰ Icsabudesambo tantiata. Nuquin Papambo tantiec aïdbëd tabadte bunquin ambi chiacpadomboen nata. Chodquetiapimbo icquid yec shënibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. ²¹ Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

*Pabiate shëcuë cuembo icquid chiaid
(Duc 11.34-36)*

²² Adshumbic abi macuësh dapa poctse tsadquin utsitsen Esusën chuipondash. —Pabiate

shëcuë cuembo icquin Nuquin Papa tantiaquiec mitsanauidi tantienquoio yec mibi bëdamboec tabadtsiac. ²³ Pabiate cuënëdabimboec yec Nuquin Papa tantienquoio yec mitsanauidi tantiec ¿bëdamboecta tabadtsia? Padenquoio. Adec mibi icsamboec tabadtsiaque. Adenda —quequin chuipondash Esusën.

Bedteuidi tantienda, quiaid

(Duc 16.13)

²⁴ Adshumbic naden Esusën chuipondash. — Mitsanauidi tantiec mibi icsamboec tabadtsiac. ¿“Naic cho,” quequin daëdshun chiacta aid daëdi mimbi nashumpatsia? Padenquoio mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata — quequin Esusën chuipondash.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusën padpiden chuipondash. — Ëmbi aden chuisho tantiash dacuëndenda. “¿Atot-simbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiash dacuëdec tabadenda. ²⁶ ¿Uicchunënda ambibi cuëte ëshë siac bacuëacsho chepadic? Padenquoio. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun

abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuédenda. ²⁷ ¿“Unëstiapimbo iquebi. Dacuëdebi,” quequidta unësenquo icpadic? Adequi dacuédquid unëstiashe. Unësteuidi dacuédënenda.

²⁸ “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bédamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bédamboshë isadpadic? Padenquo. Nuquin Papan uacpadquiobi iquec. ²⁹ ¿Cuëte bacuëec bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien icpampic. ³⁰ Cuëte bacuëec bédamboshë isadboed abadiadtsëcshumbi isac ënden chodquiac. Aid badedquo chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuédenda. Mitsana nibëdquo icte dacuédënquimbi mimbi Nuquin Papa bëdiactsëc tantiatseque. ³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuédenda. ³² Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³ Adenquo yec: “Con Icho mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi

Nuquin Papan mitsana icmetsiash. ³⁴ Èbi adsho tantiash badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquo yec —quequin chuipondash Esusën.

7

Utsibo icsaid chienda, quiaid (Duc 6.37-38, 41-42)

¹ Naden Esusën Nuquin Papan chiacpadecec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiash utsi chuiquin? Padenquo. ⁵ Abi bëtsiadaid abia bëbedadashien: “Mibitsen bëbednu,” quetsiash. Adembidi mimbiamibi icsaid ënshun: “Icsaid ënash bëdamboequien tabadiad,” quequin utsibo bëdamboen chuita. Bëdambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbi bëdamboen chiaqui tantienquo icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacimboen mibi chieshëntsiash. Chanchon icbon dashcute

nebudshun bëchish uaquin tin-tincacimboen Nuquin Papan chiaid niac-niactsiashe. Adquid chuidonenda —quepondash Esus.

*Ënenquo icquin Nuquin Papa chianete chiaid
(Duc 11.9-13)*

⁷⁻⁸ Nadembidi Esusën chuipondash. —Nuquin Papa ënenquo icquin chuidoneta. Bacuëbon: “En na,” cadoniacimboen chuidoniac Nuquin Papan mibi tantiatsiashe. Adembidi: “Ëbi bëdamboen name, Papa,” mimbi cacpadomboen bëdamboen mibi nametsiashe. Adembidi: “Ëbi nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

⁹ ¿Icsambo icquidta Nuquin Papa icpadic? Padenquo. Bëdambo icquidquo nec. Bacuëmpi: “Bundobique. Penu. Beccho, papa,” ¿qeshoda amën cudasënquin cuënotebi menepadic? Padenquo. ¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquo. ¹¹ Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” qesho tantiashun bëdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaquin chiampicpadomboen mimbi natsiaque.

Aden utsibo nashunta –quequin chuipondash Esusën.

Daëdpactsëcshun Esus tantiabente chiaid
(Duc 13.24)

¹³⁻¹⁴ Adshumbic Esusën naden chuipondash. — Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedac bimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidac bimboec matses dadpenquo abi tantiesabo yec Nuquin Papan icsaido nësecacno nidendac –quepondash Esus.

Icsambo icquid nec, quequin tantiante chiaid
(Duc 6.43-44)

¹⁵ Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiac bimboec mibi icsamete bunquieque. Adquidën chuisho tantienda. ¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic. ¹⁷ Cuëte bëdan bacuë adquiobidi

bacuëec. Cuëte icsan bacuë adquiobidi bacuëoaic.
¹⁸ ¿Cuëte bēdan bacuë chetemaidta nepec?
 Padenquoio. ¿Cuëte icsan bacuë chetequidta
 icpec? Padenquoio. ¹⁹⁻²⁰ Chetemaidbimboec
 muaquid bēdambo ictiapimbo iquec. Nuquin
 Papan chiaid niac-niaquec icsamboec tabadsho
 isun: “Muaquid nec,” quequin mimbi tantiatsiac.
 Adembidi Nuquin Papan chiaidquoio chienquoio
 icsho: “Muaquid nec,” quequimbidi mimbi
 tantiatsiaque. Adquidēn chuisho tantienda. Cuëte
 bacuëesa dēdshun nēdēncabimboen: “Nuquin
 Papan chiaid chiembi,” quec muaquid Nuquin
 Papan icsaido cuidacno nēsecaindac —quepondash
 Esus.

*Nuquin Papa yacno puduednu, queuidte chiaid
 (Duc 13.25-27)*

²¹ Utsitsen Esusēn chuipondash. —Ēbi caic: “Con
 Icho mibi nec. Mibi tantiembique. Mibi yacno
 ēbi puduedme,” ¿quequidtedida Nuquin Papa yacno
 puduedpatsiash? Padenquoio. Nuquin Papan chi-
 acpadomboen naquidquien abi yacno puduedt-
 siash. ²² Nuquin Papa yacno ēmbi yuedte ushēn
 matses dadpenshun ēbi chuiuidendac. “Con
 Icho mibi nec. Mibi caic: ‘Aidēn namiaidquoio
 nebi,’ quequin dadpen naombi. Nuquin Papan
 chiaid chuiquinc, podobitsi icsabo matses da-
 puduedaido cuemequinc comapenen tantiaquin
 ismequinc caombique. Nuquin Papa yacno ēbi
 puduedme,” ²³ quesho ēbimbo tantiec Nuquin Pa-
 pan chiacpadec bēdamboec tabadabi icsho: “Ēmbi
 tantiacmaidquoio mibi neque. Baded cuenta. Ic-
 samboec tabadquid mibi neque,” caindambi. Ēbi

adsho tantiash muainquo yec bēdamboec tabadta
—quepondash Esus.

Shubu uaquidbimboecquid chiaid
(Duc 6.47-49)

²⁴ Adshumbic Esusēn padpiden chuipondash naden chuiquin. —Ēmbi chiacpadomboen nata. Aden mimbi bēdamboen natsiaque. Shubu uaquin bēdamboen tantiaquidbimboec mibi ictsiaque. Tantia. Chuinu. Bēdamboen tantiaquidēn mananēnquo shubu uaquin buintad nitsinquad. ²⁵ Aden shubu uan ue dapa conquequidbēdi chonoc shubu chimeshadenquo icquid. Shubu nuntan anchiuidenquo icquid. ²⁶ Aden ēmbi chiacpadomboen naquid icnubi utsibo ēbi tantiesa iquendac. Aido shubu uaquin tantienquo icquidbimboec iquec. Tantienuo icquidēn nadoquid. Acte cuidi cuēmanquiobi shubu uaquin badedi unēstsēcquidquo cuate nitsinquad. ²⁷ Adquid nitsinaid ue dapabēd conquequid choquin shubu chimeshqid. Adecbidi acte cubudtoquidēn shubu nuntan mauanquid. Aden tantesa uatsēcquidbimboec ēbi tantiesa iquec. Adquid Nuquin Papan cuidtequido neque. Ēbi tantiata —quequin chuipondash Esusēn.

(Mad 1.22)

²⁸⁻²⁹ Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesēn chiampid bēdiactsēc tantiatsēcquin chuitsēcosh. Padnuen Esusēnquo comapenen tantiaquin chuiposh —quecuededpondash matses dadpenquo.

8

*Esusën daicsaid bédamiaid
(Mad 1.40-45; Duc 5.12-16)*

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpeshun tsi-banampondash.

² Adnubien dada ushumbo yec daicsaidquo choshon Esus ismenuen danëshën sebudpondash. —Ëbi bédamete bunquin mimbi ëbi bédametsiaque. Ëbi bédame, Icbo —caquien Esus: ³ —Ai, mibi bédamete bunebi. Mibi bédanendac —quequin mishtemaidquiobi mishnubi badedquo bédampondash daicsaid nibédquiec. ⁴ Adsho Esusën: —Utsibo chienquo yec nëish yua abided unës uaquido ismenuec nidta. Mibi isash: “Bédamiaid nec,” quequin ma aidon tantianu. Moisesën chuiampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bédamiaid
(Duc 7.1-10)*

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶ —Tantia. Chuinu, Icbo. Con shubun icquid con yua shëquëquenquo iccosh. Natiambo yec

unëstiadsëcquo iccoshe. Bëdameta ⁷—quesho tantiashun: —Ai, bëdamec nidnu. Nid —caquien: ⁸ —Padi. Mibi bëdamboshë icquidquo nec. Èbibi ic-sactsëcquid icquin mibi con shubun puduedmeti-apimbo iquebique. Nëshunquiobi bëdameta. Nidenquo icquin nëshunquiobi mimbi: “Bëdanta,” cac con yua bëdantsiashe. Mimbi tantiapadomboen namequidquo mibi nec. ⁹ Èbibic chuiquid dapan namiac sondado utsibo namequid nebi. Èmbi: “Nid,” cac badedi nidec. Èmbi: “Baded cho,” cac badedquo choec. Con yuan èmbi: “Nata,” cac èmbi chiapadomboen naic. Mibi adquidquibidi neque. Con yua bëdameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bëdamboen nëidën chuipéc. “Comapenen tantiaquin chuiquinuidi con yua bëdametsiashe,” quequin èbi bëdamboen tantiaquid nec. Isadaidbo adquid nibëdec. Isadaidbon èbi bëdiactsëc tantiabededtsec. ¹¹ Tantia. Chuinu. Matses utsi icquimbi sondado chuiquid dapan èbi bëdamboen tantiec. Adec nidaid utsi-utsiec yacnocquido isadaidpembro èbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. ¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tènquebudquiendac —quequin abi tsibambëquido

isadaidbo chuipondash Esusën. ¹³ Adshumbic sondado chuiquid dapa chuiquin: —Nidec nid. Mimbi tantiacpadec min yua bēdaneque —cac nidshun isquien bēdanac Esusën chuibocpadequi.

Petedon nachi Esusën bēdamiaid
(*Mad 1.29-31; Duc 4.38-39*)

¹⁴ Adash yuec-yuecpactsēc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mēdinquin Esusën bēdamepondash. Aden bēdamiac Esus pemepondash.

Esusën matses dadpen bēdamiaid
(*Mad 1.32-34; Duc 4.40-41*)

¹⁶ Petedon nachi bēdamiaid inchēshbudtsēqui Esus ismenuequin matses daicsaido dadpen bē-bēpondash. Bē-bēshobien podobitsi icsa dapuduedaido comapenec cuēdquin cuemeshumbic daicsaidotsen Esusën bēdamebampondash.

¹⁷ “Nuqui icsaid ucquin nuqui daicsaidobi bēdamiac,” quequin ěndenquio Nuquin Papan Esusën nate Isayas dada uamepampicpadomboen nanuen adopondash Esusën.

Abēd icte bunquido Esusën chiaid
(*Duc 9.57-62*)

¹⁸ Adashic abi isnuec matses dadpenquio dat-sidadsho isash abēd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Pudianec nidaneshobien Moisesën dada uampid chuibanquidēn Esus chinuntuidpondash. —Con Icbo mibi caindambi. Mibēd nidendabi —caquien: ²⁰ —ĵĒbēdta nide? Tantia.

Mibi chuinu. Bëdi chëshë shëcuën ushquid. Uic-chun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenenquio yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

²¹ Adnubien abëd capucueeneboed utsin: — Chiata, Icho. Con pa unësoshe. Chococatambono —caquien: ²² —Padi. Cho. Ma unësaidën tantienquio yachimboen ëbi tantienquio icquidon ma papa chococanu. Ëbëdtan bëdamboen naic cho — capondash Esusën amë unësaid chuiquin. Adobidanec nidanepondash chian yacno.

Natiambo cunquenuc acte tēcguasquiaid Esusën ënëdmiaid

(Mad 4.35-41; Duc 8.22-25)

²³ Chian budash Esus chedo cano antabëdtopondash. Adashic potenuc puduampondash. ²⁴ Aden potenubi nënantanquio icnuc cunquetuidpondash. Adnubien acte comapenec tēcguasquiampondash. Adec acte tēcguasquenuc cano acte ancushad-ancushadquiec yampondash cano mentoadtiadtsēcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icho. Baded ëbi nashun —caquien:

²⁶ —¿Atotsi quiaash dacuëde? Ëbi bëdiactsēc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquio ënëdpondash

cano mentoadtsenquionobi. Actetsen
tëccuasquenquo yampondash. ²⁷ Adsho isashien:
—¿Mitsipadquidënquo actebëdta cunquequid
ënëdmepashba? —quecuededpondash Esusbëd
icquido.

*Dada daëd dapuduedaido podobitsi icsabo Es-
usën cuemiaid
(Mad 5.1-20; Duc 8.26-39)*

²⁸ Aden chian potiash pudundonobien Cadada
yacnocquid podobitsi icsa dadpen dapuduedaid
dada daëd choshon Esus chuituidpondash.
Aid daëd unësaido chococaid shëcuëmbi
tabadpondash. Matses cuesunete bunquieci
dacuëdampambo icsho isash aid yacno matses
nidenquo icpondash. ²⁹ Aidon podobitsi icsabon
oncamiacpadomboen comapenec cuëdquin
Esus chuituidpondash. —¿Nuquin Papa caidën
Madombo icquin ëbi natiamequin cuidnuecta
cho? ¿Nuquin Papan cuidte ushë choabi icnubida
ëbi cuide? —capondash dada daëdshun abi
oncamequidën chiaid chuiquin.

³⁰ Uano chancho dadpenshun natiacquin
udquin pebededpondash. ³¹ Adnubien podobitsi
icsabon aid dada daëd oncameoac: —Ëbitedi
cuemiac chancho icbo-icboec dapuduedtsiabi
—quecuededpondash podobitsi icsabo. ³² Adsho
tantiashun Esusën: —Ai, mimbi tantiacpadec nid
—cac nidash chancho icbo-icboec dapuduednubi
chancho abitedi macuësh budec acte nësebudec
mentoadbudnepondash nibëdquieci yec. Adec
podobitsi icsabo dapuduenanec nidnubi dada
daëd bëdambo yampondash.

33 Adsho istanequien chanco pemequido aton matses chiec niqianec shubu dadpen yacno nidanepondash. Chanco mentoadbud-neboedbēdta podobitsi icsabo dapuduemeboed uesquin chuituidpac caondash. —Nuqui dacuēdēmboedobi bēdambo yanosh —quequin
 34 chuituidaquien anocquido abitedi Esus isec cho-chopondash. Adec cho-choshombien: —Dacuēdampambo mibi iqueque. Ēbi yacno choenda. Nidec nid —cabededpondash. Adoac Esus nidpondash.

9

Shēquēquenquio icquid Esusēn bēdamiaid (Mad 2.1-12; Duc 5.17-26)

1 —Nid —cac nidanec chian budash cano antabēdtoshon chian potiash abi iccondacnobidi Esus choapondash. 2 Adnubien utsibon dada shēquēquenquio icquid Esus ismenuen aton uetechobi bēpondash. Bēsho isumbien Esusēn: —Ēbi caic: “Aidēn bēdametsiash,” queshun bēac —quequin daicsaid chuipondash naden. —Dacuēdenda, madosio. Ambi chiaid niac-niaquec icsaboedi cuidmenquio icquin Nuquin Papa mibi bēdamboen ismembique —capondash Esusēn.

3 Adsho tantiash aid datsidadash tabadquido Moisesēn dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

4 Uanuēsh adsho ambembi tantiashumbien Esusēn aido chuipondash. —¿Atotsi quequin mimbi ēbi chieshēmpe? 5 Ambi namiaid icquin

ëmbi: “Nuquin Papa cuidmenquo icquin mibi bëdamboen ismembî” cac Nuquin Papan nêid cuidenquo iquendac. Adembîdi ambi namiaid icquin ëmbi: “Caputa,” cac nêid capuendac. ⁶ Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” queshun naimbique. Istac –quetanquin dada shëquëquenquo icquid chuiquin: –Caputa –capondash Esusën. ⁷ Adoac bëdanash aton shubuno nidpondash. ⁸ Adsho isashien: –Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec –quecuededpondash isquido.

*Ëbëd iquec cho, quequin Esusën Mateyo chiaid
(Mad 2.13-17; Duc 5.27-32)*

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: –Min matsesën na ëmbi chiacledi piucquid bedshun ëbi meneta –cac niondabi. Ambo tsadshobini Esusën istuidpondash. Istuidshumbini Esusën: –Nuquibi icnu. Cho –capondash. Adoac badedi tsibananec ¹⁰ nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec ëbëdtan piucquid bedshunquidobëdi con matsesën: “Icsaido nec,” caidombo pudued-puduedpondash. ¹¹ Adsho isumbien Esus chieshënquido Padiseyobo caidon Esusbëd icquido chuituidpondash. –¿Atotsi quiash mibi chuiquid

Esus caid icsaquidobēdi pec tabadpec? Icsambo iquec —capondash Esus chieshēnquidon.

¹² Adsho tantiash Esus nadpondash. —¿Bēdambo icquidta dauēchoquidēn dauē menepadic? Padenquio. Ma daicsaidi dauēchoquidēn menepaid yoc. Adembidi icsaidobi abi icsaid ucquin bēdambo icmenuec nebi. ¹³ Nuquin Papan naden dada uamiampid pausudshun bēdamboen naic nid. “Ēmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec. Adsho isun: ‘Mibi bēdambo iquec,’ catiapimbo iquebi” quequin Nuquin Papan dada uamiampid pausudta. Ēbibi matses bēdamboen ismequid nebi. Muaquido: “Bēdambo icquid nebi,” qesho bēdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ěnēdta,” canuec nebi —quepondash Esus abi chieshēnquido chiec.

Esusēn buna mēmunquido chiaid
(Mad 2.18-22; Duc 5.33-39)

¹⁴ Adnubien Uan acten mentoanquidbēd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mēmunquidquio nebi. Padiseyobo adembidi naquidquio nec. ¿Atotsieshun mibēd icquidon aden nainquio icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid tantiec sedenquecuededquin buna

mëmumpadic? Padenquoio. Adquidbëdtan pec cuis-honquec tabadquid. Icbo nibëdanan sedenquecuededquin buna mëmunquid. Èbi nibëdanan ëbëd icquidon ëbiuidi tantianuen buna mëmunendac — quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquoio nedesquequid. ¹⁷ — ¿“Machi sandono,” qeshun tsitsan shënimbida sandopadic? Padenquoio. “Machi sebudnushe,” qeshun tsitsan shënin sandoenquoio icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquoio icquin ambi bëdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

*Champi uincuemiaidbëdta chido bëdamiaid
(Mad 5.21-43; Duc 8.40-56)*

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unëstiadtsëcquoio iccoshe. Mishec cho. Mimbi mishac bëdantsiashe —capondash. —Mibi con Icbo canu —quequin danëshën sebudquin ismepondash. ¹⁹ Adoaquien Esus aidbëdi nidpondash.

²⁰⁻²¹ Nidnubien chido intac budted-budtedec seta 12tedi matamec bëdanenquoio yec nacchoadbudquidën Esusën cachoçtsëqui choquin: —Bëdamianquidën dashcute mishec bëdampatsiash icmanendac —qeshun ismenquoio

icquin dashcute cuëmano mishtsac caondash.
²² Adoaquien bidiadquin isun Esusën chuipondash. —Dacuëndenda. Mibi: “Aidën nac bédantsiabi,” quiacpadec mibi bédanendac —Esus quenubi bédampondash.

²³ Aid bédamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën nacpadomboen shoncate shoncaquido. Nëidic comapenec sedenquecuededquido dadpen. Aidedi icpondash. ²⁴ Adshobien Esusën abitedi chuiquin: —Baded umanuc niecun. Champi unësabi iqueque —capondash. Adoac: —“Champi unësabi iquec,” quepequien iquec —queshun Esus mamënshumbededpondash. ²⁵ Niecunan Esusën champi uiacno quënën puduedtanquin mëdinac champi uincuenash bédambo yec capupondash. ²⁶ Adsho isun champi unësaid uincuemaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniad caondash.

*Bëshuaid daëd Esusën bédamiaid
 (Duc 18.35-43)*

²⁷ Auëshquio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid Nuquin Papan chomiaid icquin bédamboen isquin ëbi bédame —quebud-quebudpondash. ²⁸ Shubu utsin puduedash abëdi tabadshobien Esusën: —“Ëbi

bëdametsiash,” ¿caindabi ique? –caquien: –Ai, a debi –quepondash.

²⁹ Adshobien aid daëdi bëmishquin: –Mimbi tantiacpadec bédanta –cac ³⁰ bëdampondash. Adsho isun Esusën: –“Bëdamioshi,” quequin utsibo chienda –capondash. ³¹ Adoboqui anocquidotedi chuiben-chuibempac caondash.

Esusën onquesa bëdamiaid

³² Bëshuaid bëdamiaid puduenubien podobitsi icsa dapuedaid onquesa dada Esus ismenuen bëpondash. ³³ Bëacsho isun Esusën podobitsi icsa dapuduemiac bëdanash onquiampondash. Aden bëdamesho isash: –Nuquin nidaid Isadaid caidënsun adoen ictenec –quecuededpondash isquido.

³⁴ Adnubien Esus chieshënquido Padiseyobo: –Podobitsi icsan icbon namiaid icquin podobitsi icsa cuemequidien nechitec –quecuededpondash Esus caic.

Esusën matses tantiaquiaid

³⁵ Aden onquesa bëdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bëdamboen iste chuipondash. Adshumbic anocquido daicsaidotedi bëdamebampondash. Adenuidi shubu dadpen yacno-yacnomboen chuibanquimbi matses bëdamebampondash. ³⁶ Abi tantienquio icquido dadpen cho-chosho isash unësquio icnuc shubiantiadquio icpondash Esus. –Abi isquid nibëdnuc bacuëbo icsamboec tabadacbimboec icsambo iquec. Nuquin Papa

bëdamboen ismete chiabi yac tantienquo yec natia chieshëmë nec bëdamboec tabadiapimbo iquec —quiash shubiantiadquo icpondash Esus.

³⁷ Adshumbic abëd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibëdnuc matses icsamboec tabadec. Aden chuibanquid nuquipadquid daëdpactsëcquo iqueque. ³⁸ Nuquin Papa chianeta. “Matses dadpenshunquo mimbi bëdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

10

Esusbëd icquido 12tedi chiaid (Mad 3.13-19; Duc 6.12-16)

¹ Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuedaid mimbi cuemendac. Adembidi daicsaido abitedi mimbi bëdamendac —quequin chuipondashi nëidtedi. ² Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. ³ Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. ⁴ Nëidic

Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshëquido Esus bedmequid. Aidedi abëd icquido icsho chuipondashi.

*Abëd icquido: Chuibeneta, caid
(Mad 6.7-13; Duc 9.1-6)*

⁵ Adshumbic: –Ëmbi chiacpadomboen chuibenenuec nidshun isadaidpembo chienda. Aido yacno nidenda. Nidaid cuëshë Samadia caid yacnocquidon shubu datambidanta. ⁶ Nuquin matses isadaidboudi chuibeneta. Bënudshun podqued tantienquio yacimboen nuquin matsesën Nuquin Papambo tantienquio iqueque. ⁷ “Mibi icsaid ënash bëdamboec tabadta. Nëbi abëd tabadtequido icmequin Nuquin Papan matses bëdamboen tabadmendac,” quequin chuibeneta. ⁸ Adembidi daicsaido bëdamequinc unësaido uincuemequinc dada ushumbo yec daicsaido bëdamequinc podobitsi icsa dapuduedaido cuemeshunquinc cabeneta. Adoshon: “Piucquid beccho,” cainda. Ëmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. ⁹ Aden chuibenec nidquin min piucquid buanenda. ¹⁰ Adembidi pete sandoaid buanenda. Dashcute utsibëdta tapucudte utsi sandoshon buanenda. Mibi tidinquete cuate abentsëqui buanta. Adec mëdadauidquio chosho isun mimbi bëdamiaidon: “Mibi bëdambo iquec. Ëbi yacno ushec cho,” mibi cac bëdambo ictsiash. Adembidi: “Mitsana nibëdsho isun mibi menenu,” mibi cac bëdambo ictsiash.

¹¹ Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidēn shubun ushta. Auēshquio nidabi yec aidēn shubunuidi ushta. ¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. ¹³ Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiac naden ismeta. Auēshquio puđuanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵ Mimbi adosho isun matses cuidte ushēmbi Nuquin Papan aido comapenen cuidendac. Ęndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquo icquido comapenen cuidendac —quepondash Esus abēd icquido chiec.

Esus tantiaquido chieshēnte chiaid

¹⁶ Adashic padpiden chuioaic: —Ęmbi naid chuibenequido icsho utsin-utsinquien mibi chieshēnendac. Bēdi nēish yua acte bunacximboec

chieshēmēnquido mibi cueste bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. ¹⁷ Mibi chieshēnquin cunesunetiadquio iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ēbi chuiquidon chuiquid dapabēdta isadaidpembo ēmbi naid chuibanu,” ēbi quenuc mibi aden buanendac. ¹⁹ Adoac dacuēdenda. “Chuiquid dapa yacnoshon ¿atotsimbi chuipatsiaba? ¿Adambi bēdamboen chuipatsiaba?” quec dacuēdenda. Chuiquid dapa mimbi bēisnubi Nuquin Papan ambi tantiacpadomboen mibi oncamendac. ²⁰ Aden aton Mayanēn ambi tantiacpadomboen mibi oncamendac –quepondash Esus.

²¹ Adashic padpidec onquec: —Ēbi chieshēnquidon ēbi tantiaquidotsen comapenen chieshēnendac. “Esus tantiaquid nec,” qeshun aton buchimbi aton utsi cunesunemendac. Amēmbi ambi tishmiaid cunesunemendac. Aton bacuēbombi chieshtoshon anibēdta amē cunesunemendac. ²² “Esus tantiaquid nec,” qeshun matses dadpenshun aden chieshēnaqui chieshtoenquio icquin ēbi tantiasho Nuquin Papan abi yacno mibi puduedmendac. ²³ Shubu dadpen yacno nidacsho chieshēnac shubu dadpen icquid utsi yacno cuenta. Anoshontsen ēmbi

naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Ëmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icho chieshënquimbi yuabotsen chieshënquid. ²⁵ Adembidi ëmbi chiacpadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

*Dacuëdenquio icquin chui, quequin chiaid
(Duc 12.2-7)*

²⁶ Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. ²⁷ Nëbi ëmbi mibitedictsëqui chuiboed dacuëdenquio icquin utsibo chuibeneta. ²⁸ Chuibenesho min dadauidtsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan

min tantiate abi icsho cuidnuequin chian anëdënquequid nësecanquid tantiaata. Adquid Nuquin Papa icsho dacuëdënta.

²⁹ Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquo icti? Padenquo. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec.

³⁰ Adembidi min manëdaid Nuquin Papan tambanaidquo nec. Aden min manëdaid abentsëc paëdsho aidën tantiec. ³¹ Aden min manëdaid tambanquid icquin padichucu bëdiactsëc tantiatatsëcquin mibien comapenen tantieque. Mibi chieshënquido dacuëdënenda –quequin chuipondashi Esusën.

*Esus con Icbo nec, quequido chiaid
(Duc 12.8-9)*

³² Adshumbic padpiden chuiquin: –Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chien-dambi –quequin Esusën chuipondashi.

*Esus tantiaquidobëdi cuëshëdte chiaid
(Duc 12.51-53; 14.26-27)*

³⁴ Adshumbic padpiden chuiquin: —
 Ëmbi chuiboed tantiashun: “Nuquin Papa
 yacnuësh choquid icquin abitedimbo bédamboen
 tabadmetsiash,” ¿caquindabi ique? Padenquo
 ictsiambi. Ëbi tantiaquidobéd ëbi tantiesabo
 cuëshedenquo icte danenda. Ëbi tantiaquidobédi
 ëbi tantiesabo cuëshëndendac. ³⁵ Amëbéd aton mado
 cuëshëndendac. Adecbidi anibéd aton champi
 cuëshëndendac. Adecbidi aton chayabéd aton
 babanën cuëshëndendac. ³⁶ Aden aton shubun
 icquidombi ëbi tantiaquid chieshënendac.

³⁷ Padnubic aton matsesuidi tantiaquidën
 ëbi bēdiactsēc tantiatsēctsiash. Aton tīta
 tantiaquinc aton papa tantiaquinc cain
 aidën chiacpadomboenuidtsēqui naquidën ëbi
 bēdiactsēc tantiatsēcquin ëmbi chiacpadomboen
 natiapimbo ictsiash. Adembidi aton mado
 tantiaquinc aton champi tantiaquinc cain aid
 bēdambo icmeteuidtsēqui bunquin ëbi bēdiactsēc
 tantiatsēcquin ëmbi chiacpadomboen natiapimbo
 ictsiash. Adquido bēdamboen istiapimbo iquebi.
 Ëbi tantiesabo nec. ³⁸ Utsibon chieshēnac
 ëbi tantiatsēchoedi badedi chieshtoshon ëmbi
 chiacpadomboen natiapimbo yantsiash.
 Adquidotsen ëbi tantiaquidpenquo iquendac.
³⁹ Matses ambi naiduidi naquid Nuquin Papa
 yacno puduedtiapimbo iquendac. Padnuen
 ëbi tantiaquin ëmbi chiacpadomboen naquid
 Nuquin Papa yacno puduedendac. Adquid
 chieshēnaqui chieshtoenquo ictsiash —quequin
 Esusën chuipondashi.

Nuquin Papan bēdambo icmete chiaid
(Mad 9.41)

⁴⁰ Adshumbic Esusēn ēbi chedo padpiden chuipondash. —Mibi chieshēnquido icnubi mibi bēdamboen isquid iquendac. Ēmbi naid mimbi chuisho tantiash: “Ai, abimbo caic,” qeshun ēbi tantiabenquin ēbi chomequidtsen tantiabenendac. ⁴¹ “Naden naindami,” quequin ambi chiaid chuibenequid Nuquin Papan bēdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bēdamboen chuisho tantianu,” quequid icsho Nuquin Papan bēdamboen isendac. Adembidi abi tantiec ambi chiacpadec bēdamboec tabadquid Nuquin Papan bēdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bēdamboen isquidotsen Nuquin Papan bēdamboen isendac. ⁴² Adembidi ēbi tantiaquid yec acte bundoacsho acte menequid Nuquin Papan cuidnanquin bēdambo icmendac. Adembidi utsibon Ēsus tantiaquido bēdamboen nashunsho Nuquin Papan bēdambo icmendac —quequin Esusēn chuipondashi. Adshun: —Chuibenetan —cac nidshumbimbi chuibenepondac.

11

Uan acten mentoanquidēn chuimiaid
(Duc 7.18-23)

¹ Esusēn: —Chuibenetan —cac abēd icquido nidanenubi auēshquiobi puduanec nidquin shubu

dadpen icquid shubu dadpen icquidquien Esusën Nuquin Papan chiaid chuibeniäc caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ic-tanec Esusbëd icoaic cho-chopondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash. ³ —Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquio icnuc ¿ada utsi chopatsiash? —caquien ⁴ Esusën: —Ëmbi nadatiambo icquin nabamboedbëdta ëmbi chuiboed Uan chiec nid. ⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquio icquid bëdanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquio icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquio nec,” quequin ëbi tantiendac. ⁶ Adshumbic nadentsen chuita. “ ‘Muambo nec, ëbi cainquio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

*Uan acten mentoanquid chiaid
(Duc 7.24-35)*

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuec nidonda? ¿Cunquequidën ishcunaid isnuecta nidtionda? Padenquio. ⁸ ¿Dashcute bëdaidquio dasiuidaid isnuecta nidtionda? Padenquio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuec nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquio Uan nec. ¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. ¹¹ “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac. ¹² Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac. ¹³ Nëbi Uanën: “Nuquin Papan abi yacnoshon bëdambo icquid chomendac,”

quequin chuipondash. ¿Ambiada adopondash? Padenquo. Ĕndenquimboshĕ tauamboen nuquin tsusedpa Moisesĕn chuibempampic. Adshumbic utsintsen. Adshumbic utsintsen. Aden Nuquin Papan ambi bĕdambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuĕmĕdquid choendac,” quequin Ediasbimboecquid Uan chote chuipampic. Bĕdamboen tantiaquin: “Nuquin tsusedpa Ediasbimboecquid Uan nec,” mimbi catsiac. ¹⁵ Bĕdamboen tantiaquidĕn adembidi tantiatsiash —quepondash Esus abi datsidadquido chiec.

¹⁶ Aden chuisho tantiash chieshtoshobien Esusĕn chuipondash naden. —Nuquin Papan chiaid tantienquo icquido yec nĕmbo icquido ¿midapadquidoen nec? Bacuĕbo nĕishnanacbičsĕcquiec mibi iquec. Bacuĕbo: “Ĕmbi chiacpadomboen nanuna,” queuidash ambi chiacpadomboen aton utsibon nainquo icsho isash nĕishash chushcananquid. ¹⁷ “‘Cuĕdĕnuna,’ queuidbosh ĕbi cuĕdĕnubi ma mibi cuĕdĕnenquo icboc. ‘Sedenquenuna,’ queuidbosh ĕbi sedenquenubi ma mibi sedenquenquo icboc,” quetsash bacuĕbo nĕishnanacbičsĕcquiec ma mibi iqueyoc. Adec nĕishĕmĕnquido yec icsambo ma mibi iqueyoc. ¹⁸ Uan pete utsi-utsien pesa iccosh. Adecbidi acte paĕmbo icquid aquesambo niosh. Adquid icsho isash nĕishash: “Ĕmbi nacpadomboen naisa nec. Podobitsi icsa dapudedashien nechitec,”

mibi quepondac. ¹⁹ Ēbien nuquin matsesën piacimboen pequid nec. Adembidi actequid acquid nebi. Adsho isash nēishun ēbitsen icsamboen chuishunquin: “Peteuidi tantiaquin nua pequid nec. Tantiadenuen acte paēmbo icquid acquid nec. Adecbidi nuquin matses piucquid bedshunquidobēd onquec icsambo icquid caidobēd onquec quequid ma aidobēdi icsambo icquid nepayoc,” mimbi ēbi capec. Padnuen bēdamboen tantiaquidēn Nuquin Papan chiacpadomboen nasho isun Uambēdta ēbi: “Bēdambo iquec,” caindac –quepondash Esus abi chieshēnquido chiec.

Shubu dadpen icquidēn tabadquido cuidte chid

(Duc 10.13-15)

²⁰ Adshumbic Esusēn padpiden chuipondash. –Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquio iquebi,” quetiadquidi chieshec adenquio iquec –queshun Esusēn naden chushcapondash. ²¹ –Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ēmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” quiash shubibudequi icsainquio yec ēnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido

adtsempampic. ²² Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobêdta bēdiactsēc cuidendac. Adoshombic: “Comapenen tantiaquin ismiaqui tantienquio icquido nec,” qeshun Codasin caid yacnocquidobêdta Betsaida caid yacnocquido comapenec sidquenuc cuidendac. ²³ Adembidi nēmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquio yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ēmbi mibi ismebocpadomboen ismiac aidon abi icsaid ěntsempampic. Abi icsaid ěnsho Nuquin Papan cuidenquio ictsempampic. Cuidenquio yac nēbi aton matses abi ictsiash. ²⁴ Nuquin Papan matses abitedi cuidte ushën: “Comapenen tantiaquin ismiacmaido nec,” qeshun Sodoma caid yacnocquido bēdiactsēc cuidendac. Nuquin Papan chomiaid icquin ěmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusën chushcapondash.

*Esusën dayacquiobimboecnuc icmete chiaid
(Duc 10.21-22)*

²⁵ Adshumbic Esusën Nuquin Papa chuipondash. —Mibi bēdamboshē iquec, Papa.

Mibi yacnocquidotedishun Icbombo yec nidaidën tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ëbi tantiabi iquec. Mimbi tantiamiac nëidon ëbi tantiec. Aden mimbi bëdamboen naic. ²⁶ Mimbi tantiacpadomboen mimbi bëdamboen naic. Mibi bëdamboshë iquec, Papa –quequin Esusën Nuquin Papa chuipondash.

²⁷ Adshumbic abi datsidadquido chuipondash. –Nuquin Papan ambi tantiaidtedi ëbi chuimec. Ëmbi naboedbëdta ëmbi nate abitedi con Pan ambentsëqui tantiec utsibon tantienquio icnuc. Adembidi Nuquin Papan natebëdta ambi naboed abitedi ëmbentsëqui tantiemi. Aden Nuquin Papa tantiaquin: “Nëidtedi matses bëdamboen tantiamemi,” queshun: “Nuquin Papa nadquio iquec,” quequin tantiamemi. ²⁸ Ëbi tantiata. Dayacquio yacbimboecnuc mibi bëdambo icmembique. “¿Mitsipadequibi Nuquin Papa yacno puduedpe?” quec ¿uimambo yacbimboecta mibi icpe? Adquidën ëbi tantiasho Nuquin Papa yacno puduedtequid mibi icmembique. Ëbi tantiata. ²⁹ Con Icho ëbi cata. Con yuambo icquin ëmbi chiacpadomboen nasho mibi bëdamboen isquin dayacquio yacbimboecnuc mibi bëdambo icmembique. Ancanesambo yec bëdambo icquidini neque. Con Icho ëbi cata. Adsho mibi bëdambo icmembique. ³⁰ Mibi ancainquio icquin dayacquio yacbimboecnuc bëdamboen mibi tabadmembique. Con Icho ëbi cata –quequin chuipondash Esusën.

12

Esusbëd icquidon petsëcsho istuidshun chushcaid

(Mad 2.23-28; Duc 6.1-5)

¹ Adshumbic chonoadtemaid ushën Esusbëd capucuenequin tied matanquin bundotsëcshun tiedën caniquid ëshchicshun petempi petsëccondambi. ² Pesho istuidshumbini con tsusedpabon chiampid namequido padiseyobon: —Is. Mibëd icquido chonoadtemaid ushëmbi chonoadeque —capondash Esus chuiquin.

³ Adoaquien Esus: —Ma icsapenquio icpayoc. ¿Nuquin tsusedpa Dabidën bundoshon ambi petemaidquio pepampid chuiquin dada uapampid isamboda ictio? ⁴ Aidën Nuquin Papa tabadte shubu uashunaid abi puduedtemaidën puduedshun ambi petemaid pan sanaid istuidpampic. Aid panëmpi nëish yua abided unës uaquidon petequid nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaidi napampic. ⁵ Adembidi chonoadtemaid ushën natemaid chiaid niacquimbi nëish yua abided unës uaquidon aid ushëmbi Nuquin Papa tabadte shubu uashunaidën puduedshun nacenendenepec. Nuquin Papan chiacpadomboen naiqui icsainquio icpec. ⁶ Nuquin Papa tabadte shubu uashunaid tantiaquin adopec. Aid shubu bëdapabi icnuc bëdamboshë icquid nebi. ⁷ Nuquin Papan naden chiaid mimbi bëdamboen tantienquio iquec.

“Ëmbi chiacpadomboen abentse-abentsen mimbi naic.

Adoquimbi ëmbi chiaid utsi niaquec mimbi ic-saido caido mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bëdamboen tantiaishun ëbëd icquidon bëdamboen nasho mimbi chushcainquio ictsenoc. ⁸ Tantia. Nuquin Papan chomiaid icquin chonoadtemaid ushë ëmbibi chimpid icnuc ëmbi tantiacpadomboen aid ushëmbi ëbi tantiaquido namembique —quepondash Esus ëmbi petsëcsho istuidquido chiec.

*Mëicsatsaid bëdamiaid
(Mad 3.1-6; Duc 6.6-11)*

⁹ Adanec nidec Nuquin Papan chiaid chuibante shubun puduedshun ¹⁰ isaquien mëicsatsaid icpondash. Adnubien padiseyobon: —Chonoadtemaid ushëmbi bëdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —qeshun Esus chuituidpondash. —¿Nadquid chonoadtemaid ushëmbi matses bëdamequinda Nuquin Papan chiaid niacpec? —caquien ¹¹ Esusën: —¿Ada min nëish yua obeca caid icpec? Adquid chonoadtemaid ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushëmbi mimbi chonoadquin chicpatsiac. ¹² Aden min obeca bëdiactsëc tantiec mibi bëdapabi icnuc matses tantiaquioquin nashunquid bëdamboshë

ictsiash. Nadquid chonoadtemaid ushëmbi matses aden bëdamboen nashunquidën Nuquin Papan chiaid niaquenquo ictsiash –quequin Esusën abi icsamenu caquido chuipondash.

¹³ Adotanquimbien Esusën mëicsatsaid chuiquin: –Mëcueta –cac mëcuc bëdampondash aton mëdante abiuc daëdi bëdambo yec.

¹⁴ Adsho isashien abi chieshënkuido padiseyobo nëishquiopac caondash. Adec nëishanec nidash aton matses utsibobëd: –Cuesunequimbien Esus ictiad –quecuededpac caondash.

Esusën nate ëndenquimboshë chiampid

¹⁵ Adnubien Esus: –Ëbi cuesunetiadquo iquec –quianec auëshquiobi puduanec nidpondash. Nidsho isumbien matses dadpenshun tsibanampondash. Adshumbic aidon bëaid daicsaidotedi bëdamebampondash. ¹⁶ Adshumbic

ambi bëdamiaido chuiquin: –“Bëdamioshi,” quenda –quequin chuipondash Esusën: –Ëbi abi chuiquid dapa icmenushe –quiash adpondash Esus.

¹⁷ Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ëmbi chomiaid ëmbi chiacpadomboen naquidquo nec.

Aid tantiaquiec bëdambo iquebi.

Con Mayan bëdambo icquid abëdi tabadmemb.

Adoac ëmbi bëdamboen iste isadaidbobëdta matses utsibo abitedi bëdamboen chiendac.

¹⁹ Chushcanante bunenquo yec ancanenquo iquendac.

Chuiquid dapa ictiapimbo iquendac.

20 Icsambo icquido yec shubiquido yec natiaic tabadquido yec daicsaido yec quequidon abi bēdiactsēc tantiabentsēcsho bēdamboen isquin bēdamboen tantiamendac.

Nuquin Papan chiacpadec cuidte ushē choabi icnuc adoendac.

21 ‘Nuquin Papan tantiacpadomboen matses bēdamboen namendac,’ queshun nidaid utsi-utsiec yacnocquidon matses dadpenshun aidi tantiendac,”

quequin Esusēn bēdamboen nate chuiampic Isayasēn.

Podobitsi icsan namiaidi Esus nec, quiaid

(Mad 3.20-30; Duc 11.14-23; 12.10)

22 Adnubien Esus ismenuen daicsaid bēpondash. Dapuedeshun podobitsi icsan bēshu uain eme uaidi onquesa nepondash. Isenquio yec onquenquio icshobien Esusēn bēdamepondash. Adoac isbenequi onquiampondash. 23 Adsho isashien Esus datsidadquido: —Is. Comapenen tantiaquin nabanquidquio nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquio Nuquin Papan chomiaidien nechitec —quecuededpondash.

24 Adsho tantiaish Esus chieshēnquido padiseyobo: —¿Aidta nedic? Ma aidpenquio neyoc. Bet-sibu caidēn podobitsi icsan icbon namiaid icquimbien Esusēn podobitsi icsa cuemechitec —quequin otacquio tantiapanēdash.

25 Adshobien Esusēn aidon otacquio tantiaid ambembi tantiaishun naden chuipondash. —¿Adquidēnda aton yuabi cuemepatsiash? Padenquio. Chuiquid dapan aton yuabo

nëishtanquin chushcac cuësh-cuëshêdec aton yuabo uesadec nietsiash. Aido nibêdnuc chuiquid dapa ictiapimbo ictsiash. Adecbidi shubu dadpen icquidên tabadquido chushcananash cuësh-cuëshêdec niquian shubu dadpen icboedi daëdpactsëc yanec. ²⁶ “Betsibu caidbidi Satanas caidëmbi namiaquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquio ictsiash. Satanasën cuemiac aidbëdi aton yuabo cuësh-cuëshêdtsiash. Adnuc Satanas aton icbopenquio yantsiash. ²⁷ Mibêd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquio icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibêd icquido. ²⁸ Nuquin Papan Mayanën namiaquimbi podobitsi icsa cuemioc. Ëmbi adosho isash: “Nëbi matsesbêd icquin Nuquin Papan namiaidën naosh,” quetiadquidi mibi nec –quepondash Esus.

²⁹ Adashic abi onquec: –Tantia. Mibi chuinu. Ampenuesho icbon istuidac ampequidên icbo uidên uabi ampeshuntiapimbo iquec. Icbo uidênquio icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbien comapenen tantiaquidquio nec. Uidên uacbimboen nadatiambo icquin nabanquin aton yua cuemepombi. ³⁰ Ëbi con icbo cainquio icquido Satanasën yuabo nec.

Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹ Adshumbic nadentsen chuipondash. — Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquo icsho Nuquin Papan bëdamboen istiapimbo iquec. ³² Ëbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquo icquin icsamboen tantiasho adembidi ënenquo icquin bëdamboen istiapimbo iquendac —quequin abi chieshënquido Esusën chuipondash.

*Bëdambo icquid nec, quequin tantiate chiaid
(Mat 7.15-20; Duc 6.43-45)*

³³ Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. ³⁴ Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. ³⁵ Bëdambo icquidën ambi bëdamboen tanti-

aid bēdamboen chuitsiash. Icsambo icquidēmbien ambi icsamboen tantiaid icsamboen chuitsiash. Aden mimbi icsamboen chuipoc. ³⁶ Ambi cuidte ushēn Nuquin Papan: “¿Ada bēdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bēdamboen nadeniombi,” qesho icsano nidmenquio iquec. Padnuen utsi: “Padenquio. Icsamboembimbi chuidenechitoc,” qesho icsano nidmequin cuid-eque. Icsamboec onqueboedi ēnēdta –quequin Esusēn abi chieshēnquido chuipondash.

*Padiseyobon: Ēbi isme, quequin Esus chiaid
(Mad 8.12; Duc 11.29-32)*

³⁸ Aden chuisho tantiaishumbien abi chieshēnquido utsibon Esus chuituidpondash. –“Nuquin Papan chomiaidini nec,” quequin ēbi ismequin nadatiambo icquin nabanta. Isnu –quepondash padiseyobo Moisesēn dada uapampid chuibanquidobēdi.

³⁹ Adoaquien Esus: –Padi. Nuquin Papan chiaid niac-niaquec mibi icsamboshē iquec. Ēbi tantiate bunenquio icquimbi mimbi: “Ēbi isme,” ēbi capec. Adsho nēbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidēn nampid tantie? Aid yampicpaden naindambi. ⁴⁰ Chishcambiecquid dapan chebudac aidēn pucun uec daēdec ushacsho ucbudac Onas padpidec nidpampic. Adecbidi unēsacsho chococac Onas yampicpadec daēdec ushash uincuenendabi. Aden ismendambi. ⁴¹ Ēbi tantienquio yec mibi icsambo iquec. Padnuen

Nuquin Papan chiaid Onasën chuibanac shubu dadpenquoio icquid Ninibe caid yacnocquido badedi icsainquoio yec ënëdpampic. Nuquin Papan chiaid chuibanquid Onas bëdambo icpampic. Ëbien bëdamboshë icquidquoio nec. Adquid icquin nadatiambo icquin dadpen ismiaqui mimbi ëbi tantienquoio iquec. Aden ëbi tantienquoio icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. ⁴² Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquoio Sadomonën bëdamboen chuipec,” quepampic. Ëmbien abitedi tantiaquid icquin nadatiambo icquin ismeuidpoc. Ado aqui mimbi tantienquoio icpec –quepondash Esus abi chieshënquido chiec.

Abi nianaid podobitsi icsa dapuduedoaid

(Duc 11.24-26)

⁴³ Adshumbic naden Esusën chuipondash. –Icsaquido mibi nec. Podobitsi icsa dapuduedaidbimboecquid mibi nec. Tantia. Mibi chuinu. Abi dapuduedaid matses nianashi podobitsi icsa abi dapuduedtequid nibëdacno yuec capucuen-capucuenec. Adtanequi: “Ëbi icbocnobidi dapuduedoaic nidebi,” quianec choec. ⁴⁴ Chonobi ambi niamboed matses:

“Ēbi dapuduedaid podobitsi icsa nibēdnuc bēdambo iquebi. Adquid chomeoatiapimbo iquebi. Ēmbimbo naic bēdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuduedtequidquo nēid nec,” quianec
⁴⁵ abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuduedec. Adnuc podobitsi icsa abentsēc dapuduedaid yec ĕnden icsambo icboedi aido dadpen dapuduedaid yec buēdanquiec aid matses icsamboshē yanec. Adquid mibi iquec. “Bēdambo iquebi,” queboedi nēbi mibi icsamboshē yanec —quequin Esusēn chuipondash.

Anibēdi Esusēn utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuec chopac caondash. Umanuc tabadnubi⁴⁷ utsin puduedshun Esus chuituidpondash. —Mibi isec tita min utsibobēdi choaccosh. Umanuc tabadec —caquien badedi nidenquo yec
⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin⁴⁹ abēd icquido mēdquin ismepondash. —Nēid ēbēd icquido con utsibo caimbi.⁵⁰ Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ēshē siaid chiaid
(Mad 4.1-9; Duc 8.4-8)

¹ Adtanec nidec chian budash cuëmano tabadtuidpondash. ² Tabadtuidsho isash matses dadpenquoio cho-choash tsucus-tsucustsëcquoio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. ⁵ Ëshë utsibic nidaid tsasimbo yacno siac badedi dëyucuidash ⁶ aton tapun nidaidën puduedenquoio icnuc ushë chënquequidën badedi unësquid. ⁷ Ëshë utsibic nisanquid diadacno siaid dëyucash canidouidtsëcsho nisanquidën dayunac unësquid. ⁸ Padnuen ëshë utsi-utsiec nidaid bëdanquoio siac dëyucash caniash dadpenquoio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiate shëcuë nibëdquieta iquec? Ëmbi chuiboed bëdamboec pausudta —quepondash Esus.

Ompoacbimboen chiec nebi, quiaid

(Mad 4.10-12; Duc 8.9-10)

¹⁰ Adsho tantiaishun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien ¹¹ Esus nadpondash. —Utsibo tantiamenquoio icquin Nuquin Papabëd tabadte chuiquin nëbi

mibiuidtsëqui tantiamembi. ¹² Nuquin Papa tantiatiadquo icquidën ëbi tantiasho bëdamboen tantiamendambi. Nuquin Papa tantiauidtsëcquidën ëbi tantienquo icsho ëmbi ompoacbimboen chiac tantienquo ictsiash. ¹³ Ompoacbimboen aido dadpen chuibanembi. Ëmbi naid isun ëbi tantienquo iquec. Ëmbi chuisho pamumëdacbimboen tantienquo iquec. Adsho aidon tantiatiapimbo icnuc chiembi. ¹⁴ Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic. “Chiac tantiaboshombi tantienquo iquendac. Ismiac isquioboshombi: ‘Ai, aidi nec,’ cainquo iquendac.

¹⁵ Ai, ëmbi chiaid tantiatiapimbo iquec. Ushacbimboen tantienquo yec pamumëdacbimboec chieshëmëndombo iquec. Ëmbi tantiate bunenquo iquec. Ëmbi chiaid tantiaquidombien paposhquiacbimboen bëdamboen tantiabentsiash. Pausunacbimboen tantiashun ëmbi chiacpadomboen natiadquo yansho aton chiesh bëdametsiambi. Aton chiesh bëdamete bunenquo iquec,”

quequin Nuquin Papan dada uamepampic — quepondash Esus abëd icquido chiec. ¹⁶ Adashic aidobidi chiec: —Isayasën chiacpadomboen utsibon ëbi tantienquo icnubi mimbien ëbi tantiec. Ëmbi isec mibi tabadec. Ëmbi chuibansho tantiash: “Ai, abimbo caic,” quec mibi bëdambo iquec. ¹⁷ Ëmbi chote chuipampidobëdtan bëdamboec tabadquido

dadpeshun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatiadquio yequi tantiambobi unëspampic –quepondash Esus.

*Piacbo siaid sebadënquio chiaid
(Mad 4.13-20; Duc 8.11-15)*

¹⁸ Adashic abi onquec: –Tantia. Ëmbi piacbo ëshë siaid quequin chuiboed sebadënquio mibi chuinu. ¹⁹ Nuquin Papabëd tabadte chiaid piacbo ëshë siaidbimboecquid nec. Nuquin Papan chiaid chiaqui tantiadenquio icsho Satanasën nac badedi bëshumpec. Uicchunën piacbo ëshë paëdaid badedi chiachimboen adopec. ²⁰ Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec. ²¹ Adsho: “Nuquin Papan chiaid tantiaquid nec,” queshun utsibon chieshënac badedi chieshtoshon tantienquio yanendac. Piacbo ëshë tapunuidtsash unësacbimboen adoendac. ²² Utsibic Nuquin Papan chiaid tantiatsashi ambi dacuëdquin tantiaiduidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquio icpec. Isitodon dayunac unësacbimboen adoendac. ²³ Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquio icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc

adquidbidi yanendac –quequin abi tantiate
chuipondash Esusën.

Ëshë icsambo icquid seuanaid chiaid

²⁴ Adshumbic Esusën naden chuipondash. —
Tantia. Nuquin Papan namiaid tantiamenuen
utsi chiacbimboen chuinu. Tiedën caniquid
pete adosbiecquid icbon siac caondash.
²⁵ Adanec nidambic inchëshëmbi choshon
chieshëmënquidën ëshë icsambo icquidtsen daëd
uain seuanac caondash. ²⁶ Adoac adosbiecquid
canidotsëcnubi abëdi tancandaëdpamboec
icsambo icquid canidotsac caondash. ²⁷ Adsho
istanquin yuabon aton icbo chuituidpac
caondash. “¿Pete ëshëda sio?” cac: “Ai,” qesho
tantias: “Icsambo icquidbëd tancandaëdec
canidopacvoc. ¿Mitsipaden sio?” quequin
yuabon icbo chuipac caondash. ²⁸ Adoaquien:
“Chieshëmënquidëmbien seuanchitash,” cac:
“¿Chicshunetanquindambi icpe?” yua qesho:
²⁹ “Padi. Petebëdi chiquidtsiash. ³⁰ Aidbëdi
ma canipanuna. Ëshëacsho tacuesquimbi
teshun sianun nanuna. Adoshombic icsambo
icquid tsindobanshun nëdëncanun nanuna.
Icsambo icquid nëdëncatanquimbi pete bedshun
sandoshon shubun dectandonon nanuna,”
quepac caondash tied icbo –quequin Esusën
chuipondash.

Esus tantiaquido dadpen yante chiaid

(Mad 4.30-32; Duc 13.18-19)

³¹ Adshumbic abi tantiaquido dadpen yante
tantiamenuen Esusën naden chuipondash. —
Cuëte bacuë ëshëmpi ³² pistsëcquidi nuamboshë

caniec. Aid cuëte cuidin uicchun dadpen tabad-tonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac –quepondash Esus.

*Abi bëdamboen tantiate Esusën chiaid
(Mad 4.33-34; Duc 13.20-21)*

³³ Adshumbic Esusën abi bëdamboen tantiate chuipondash. –¿Mitsipad nami uaid icpec? Aniacsëc nami uashun utsibëdta daëd uain cabiunac abichobi batambo yanec. Adembidi ëbi bëdiacsëc tantiatsëcboedi ëmbi chiaid tantiash ëbi bëdamboen tantiaquid yanendac ³⁴ –quequin Esusën chuipondash. Sebadënquo chienquo icquin ompoacbimboenuidi Esusën chuipondash.

³⁵ Aden Ësusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquo chienquo icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquo chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. –“Chieshëmënkuidën ëshë icsambo icquid siaid nec,” quequin mimbi chuiboed en sebadënquo chui, Icho.

Tantianu. ¿Atotsi chuitiadquo icquin aden chio? ³⁷ —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquo tantiaequin matses bëdambo icmequid nebi. ³⁸ Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec. ³⁹ Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquo iquéc. Adsho badedi cuidenquo icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuc ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. ⁴⁰ Icsambo icquid tsindoshon nëdëncacimboen Nuquin Papan cuidte ushëmbi icsambo icquido cuidendac. ⁴¹ Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac ⁴² bedshun chian anëdënquiacno nësecaindac. Adoac natiaic mëyadbudec sidquequendac. ⁴³ Padnuc ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiaishun ëmbi chiacpadomboen nata —quepondash Esus.

Nuquin Papaböd tabadte bunquiota, quiaid

⁴⁴ Adshumbic padpiden Esusën chuipondash. — Tantia. Matses ambi istuidaaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquo icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” queshun piucquid ompoampid bedpac caondash. Adomboen matsesën Nuquin Papaböd tabadte bunquin aton nauidi nainquo icquin Nuquin Papan chiacpadomboenuidi nac bëdambo ictsiash.

⁴⁵ Tantia. Casëdu bëdaidquo bunaidtsen mibi chuinu. Dadan casëdu bëdaidquo bunquin bednuen nibëbenepac caondash. ⁴⁶ Adshun bëdaidquo istuidash: “Nadquid utsi nibëdec,” quiaish comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papaböd tabadte bunquin matsesën ëbi tantiaquiac bëdambo ictsiash — quepondash Esus.

Nuquin Papan cuidte ushë Esusën chiaid

⁴⁷ Adshumbic Esusën naden chuipondash. — Tantia. Mibi chuinu. Nuëcquid nibedacbimboen naindami. Isadaidbon nuëcquid dadpenquo bedte nëshaid dapa acte nënequin ⁴⁸ nëshaid cubu-cubuctsëcquo icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden

Isadaidbon nuëcquid bedquid. ⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacbimboen mattses bédambo icquido Nuquin Papa yacno nidmequimbi ⁵⁰ icsambo icquido chian anëdënquiacno nësecaindac. Adoac natiaic shubiquiendac — quequin Esusën Nuquin Papan cuidte chuipondash.

⁵¹ Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiachimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac —quepondash Esus.

Nasaded yacno Esus nidaid

(Mad 6.1-6; Duc 4.16-30; Uan 4.44)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton mattses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? ⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. ⁵⁶ Aido nëmbo tabadosh. Aton

chibichedotsen nēmbō tabadosh. ¿Comapenen tantiaquidta nedic? Ma adquidpenquo neyoc — quequin ⁵⁷ Esus chieshēnquin tantienquo icpondash.

Adsho tantiashun Esusēn nadopondash: —Nuquin Papan: “Ĕmbi tantiamiacpaden chuibanta,” caidēn chiac utsibon tantiaquid. Adquidēn abi caniacnoshon chuibansho tantienquo icquid —quepondash Esus. ⁵⁸ Adshun nadatiambo icquin nabanquin daēdpactsēc ismetsēccondash: —“Nuquin Papan chomiaidquo nec,” quetiapimbo iquec —queshun.

14

Uan acten mentoanquid

unēs uaid

(Mad 6.14-29; Duc 9.7-9)

¹ Adnubien ancaquidēn Edodes caidēn Esusēn comapenen tantiaquin nabanaid chuisho tantia-pac caondash. ² Adshumbic aton yuabo chuipac caondash. —Uan pado acten mentoandened nepash icnui. Ĕmbi mapi butemiondaidi uincuem-pash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesēn Uan cuesuniac caondaaid chuinu. Tantia. Uanēn: —Mimbi bedaid Edodias caid min chidopenquo nec. Min utsi Uedipe caidēn chido bedshun Nuquin Papan chiaid mimbi niaquec —cadoniaquien Edodesēn chieshtoshon uidēn uameshun Uan quēnēn nauedmepac caondash.

⁵ Adshumbic Uan cuesunetiadquo icquimbi aton matses: —Nuquin Papan chiaid

chuibanquidquo nec –quesho tantiashun aido dachuëdënquin Uan badedi cunesunenquo icpac caondash.

⁶ Adshumbic Edodesën: –Ëbi tishaid ushë nec –queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: –Bëdamboenshë mimbi naic –queshun ⁷ naden chuipac caondash. –Tantia, champi. ¿Atotsi buneque? Mibi bunaidquo mibi menenu. “Nuquin Papan cuidnushe,” quiash muatiapimbo iquebique. En ëbi chui –capac caondash Edodesën. ⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. –Uan acten mentoanquidën mapi butetanquin pada-padaid dapan ananshun baded ëbi mene –capac caondash champin Edodes chuiquin. Uanën –Min bënë nianshun utsi bedmec mibi icsaic –cac champin tita Uan cunesunemete bumpac caondash.

⁹ Adoaquien Edodesën: –¿Atotsi quepequini ado? ¿Adoenquo ictiadtsimbi icpoba? –quequin ambi chuiboed niactiadquo icpac caondash. –Ëbi isedquidon: “Mibi muambo nec,” canushe –quetanquin champin chiacpadomboen aton yuabo: –Uan mapi butetan –capac caondash.

¹⁰ Adoac quënën tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanböd ictenedon Uan mapi buti-acscho dada bedanquin buanshun chococatampac caondash. Adotanec Esus chiec nidpac caondash.

*Comapenen tantiaquin 5000tedi pemiaid
(Mad 6.30-44; Duc 9.10-17; Uan 6.1-14)*

¹³ Nidshumbic: —Mibi acten mentonaid mapi butiaccosh —catuidpondash. Adsho tantianec cano antabëdtoshon chian potiaash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquïo icquin daicsaidotedi bëdamebampondash.

¹⁵ Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusën: —Padi. Ma tabadnu. Mimbibi peme —capondashi.

¹⁷ Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. ¹⁸ Adsho: —Aidtedtsëqui beccho —cac meniondambi.

¹⁹ Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi

menebampondash. Adembidi nuëcquidëmpi bushtebantsëcshun menebampondash.

²⁰ Adoaquien nua cubudcuededquin pebeded-pondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsëcquio iquec pete cuësh-cuëshaid napi uaid. ²¹ Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid
(Mad 6.45-52; Uan 6.16-21)*

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³ Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquio yanubi cunquetuidpondash. Adnuc acte comapenec tēccuasquiampondash uncadenquio yec. Comapenec acte ish cudnuc cano mentoadtiadpambo icpondash.

²⁵ Adnubien badiadte anoentsëqui acte bëntse Esus chopondash. ²⁶ Acte bëntse chosho isashini: —Podobitsi nec —quiash dacuëdtanec sidquecuededpondac. ²⁷ Adshobini Esusën: —Ëbien neque. Dacuëndenda —capondash. ²⁸ Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹ Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëcondash. ³⁰ Esusuidi

isec bëdamboec niduidtsequi acte comapenec tēccuasquesho isash dacuëdtanec acte bëntse niduidtsëboedi mentoadtsempondash. —

Ëbi bed, Icbo. Mentoadebique —caquien

³¹ Esusën badedquoio bedtanquin indopondash.

Aden indoequi: —“Con icbon ëbi bëdamboen nametsiash,” queboedi ¿atotsi quiaash dacuëdtano?

Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquenuio yampondash.

Actetsen tēccuasquenquoio yanondash. ³³ Adsho

isun cano antabëdquidon: —Mibi bëdamboshë

iquec. Comapenen tantiaquidquoio yec Nuquin

Papan Madombo mibi nec —quequin Esus

tantiabededpondash.

*Quenesaded yacnoshon Esusën bëdamiaid
(Mad 6.53-56)*

³⁴ Adashic chian potiash Quenesaded yacno pudundopondash. ³⁵ Pudundosho

isun anocquidon: —Esus chosh —quequin

uanocquido abitedi chuibeniac daicsaido

abitedi bë-bëpondash. ³⁶ Bë-bëshumbic: —

Dashcuteuidtsëqui mishashi bëdantsiash —

queshun Esus chuituidquin: —Min dashcute

cuëmano daicsaido mishme —cac mishmiaqui

bëdampondash abitedi.

15

Padiseyobo icsaid Esusën chiaid

(Mad 7.1-13)

¹ Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash. ² Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc —quepondash Esus chieshënquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiapadomboen naquin ma mimbi Nuquin Papan chiaidquo niac-niacpayoc. ⁴ Tantia. Mibi chuinu. “Titabëdta papa chieshënenquo icquin bëdamboen tantiata,” quequin Nuquin Papan chiampidquo ma mimbi niacpaboc. Adembidi: “ ‘Con pa unëspashun,’ quec chieshëmënuquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec.

⁵ Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsiash,” mibi quepec. “ ‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën ⁶ cudasënac bëdambo ictsiash,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. ⁷ “Nuquin Papa tantiaquidquo nebi,” quec muaquid mibi nec. Ëndenquimboshë

Nuquin Papan chuimiac nuquin tsusedpa Isayas caidën mimbi icsamboen tantiate chuiquin dada uapampic naden.

⁸ “Isadaidbo: ‘Nuquin Papambo tantiemi,’ quepec.

Adboedëmbi ëmbi chiaid niacquin ëbi tantienquio iquec.

⁹ ‘Ma Nuquin Papan ëbi bëdamboen isnu,’ queboedëmbi ëbi bëdamboen tantienquio iquec.

Ëmbi chiaidquio namenquio icquin aton matsesën chiaiduidi namepec,”

quequin Isayasën Nuquin Papan chiaid dada uapampic –quequin Èsusën abi chieshënquido chushcapondash.

Ana shëcuënuësh choaid chiaid
(*Mad 7.14-23*)

¹⁰ Adshumbic abi isec datsidadquido ompoacbimboen chuipondash. –Tantia.

Mibitedi chuinu. ¹¹ Ana shëcuën puduedaidën matses icsaten mimbi dampec. ¿Adquidënda

matses icsapec? Padenquio. Ana shëcuënuësh choaidëmbien matses icsatsiash –quequin

Esusën chuipondash. ¹² Adnubien abëd icquidon: –Mimbi aden chuiboed tantiashun

padiseyobon mibi chieshënosh, Icho –caquien: ¹³ –Dacuëndenda. Icsa bescatanquin tsindoshon

nëdëncacchimboen ambi tantiamiabi yaido ambembi chuiquido Nuquin Papan cuideque.

¹⁴ Dacuëndenda. Padiseyobo bëshuaidbimboec icquido neque. Bëshuaidën aton matses bëshuaid

utsi bëdamboen buantiapimbo iquec. Buanuec abi shëcuë ampaëdtsiash. Adembidi Nuquin Papan

chiaidpenquo namequin aton matses bēdamboen tantiametiapimbo iquec —quepondash Esus abēd icquido chiec.

¹⁵ Adshobien Petedon: —Mimbi ana shēcuēnuēsh choaid quequin chuiboed tantiambo iccombique. Aid sebadēnquo chui. Tantianu, Icho —caquien: ¹⁶ —¿Tantiamboda icco? ¹⁷ Chuinu. Tantia. Ana shēcuēn puduedaid mimbi peboed min pucun uedoash chimute shēcuēnuēsh choec. Adquidēn Nuquin Papan chiaid niacmenquo iquec. ¹⁸ Matses onquiaidimbi ana shēcuēnuēsh choaid caoc. Abibi uquēducūesh onquec: “Adoembi,” quequin otacquo tantiaquin naic matses icsatsiash. ¹⁹ Icsambo icquido yec: “Ai, adoembi,” quequin otacquo tantiashun Nuquin Papan chiaid niactsiash nadquidēn. Nēidic unēs uanquid. Nēidic aton chidopenquo chudquid. Nēidic aton bēnēpenquo chudmequid. Nēidic aben uequid. Nēidic ampequid. Nēidic muaquid. Nēidic icsamboec chuishumēnquid. ²⁰ Adquidtedi: “Ai, adote bunebi” quequin otacquo tantiash icsaquid nec. Padnuen penush mēpamēdenquo icquin Nuquin Papan chiaid niaquenquo ictsiash —quepondash Esus abēd icquido chiec.

*Isaidaidpembo chidon Esus tantiaid
(Mad 7.24-30)*

²¹ Adanec auēshquiobi Esus nidpondash. Shubu dadpen icquid Tido caid anoentsēqui datambidanec choec shubu dadpen icquid utsi Sidon caid anoentsēqui chopondash.

²² Adnubien anocquid cananeyabo chidon Esus cuēntuidpondash. —Tsusedpa Dabidēn tsyuecquid

Nuquin Papan namiaid icquin ëbi bēdamboen ista. Con champi podobitsi icsa dapuduedaid yec natiambo iqueque. Con champi bēdameta –caquien ²³ Esusēn ěcbedenquio icpondash. ěcbedenquio yaqui chidon tsibanbanquin cuēnbampondash. Adsho tantiashun Esusbēd icquidon: –Chieshanquiec cuēdpeque. Cuemepa –caquien ²⁴ Esusēn cuemenquio icquimbi aid chuiquin: –Nuquin Papan chiacpaden Isadaidbo matsesba Nuquin Papa bēdamboen ismete tantiamenuec nebi. Bēnudac bimboec icquin Nuquin Papa tantienquio icsho aidoba tantiamenuec nebi –quepondash Esus.

²⁵ Adsho tantiash nidenquio yec chido cuēdboed Esus ismequin danēshēn sebudtsec: –Ěbi nashunta, Icho. Con champi bēdameta –queshobien Esusēn: ²⁶ –¿Aton bacuēbo pemenquio icquimbi aton opa pemiacta bēdambo icpatsiash? Padenquio. Adembidi Nuquin Papan con matses caidotedi tantamiabi utsibo ěmbi nashunac icsambo ictsias. Isadaidboba tantiamenuec nebi –quepondash Esus.

²⁷ Adsho tantiashun chidon: –Ai, abimbo mimbi caic. Padnuen bacuēbon pequin paēdmiaid opashēmpin petsēcquid. Adembidi mimbi comapenen tantiaquin nabanaqui isadaidbo dadpen bēdanubi isadaidpembo abentsēc tantiaquid icsho ëbi nashunquin con champi bēdameta ²⁸ –caquien Esusēn: –Ai. Ěbi tantiaquidquio mibi nec. Mimbi chiacpadec min champi bēdanendac –quesho tantianec aton shubuno nidshun isquien aton champi bēdanac Esusēn chuinubi.

Daicsaido dadpen Esusën bédamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquo cho-choquin daicsaido dadpen Esus ismenuen bë-bëpondash. Tidinguequido yec bëshuaido yec shëquëquenquo icquido yec onquesabo yec daicsaido utsibotedi yec quenuc bë-bëpondash. Adsho Esusën bédamebampondash.

³¹ Bédamiac onquenquo icboedi onquianondash. Bëshuacboedëmbi isbenondash. Capuenquo icboedi capucuenondash. Daicsaido utsibo adecbidi bédanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bédamepash icnui. Nuquin Papa bédambo iquec —quepondash Esusën bédamiaid tantiaish.

Matses 4000tedi pemiaid

(Mad 8.1-10)

³² Adec tabadsho isashien Esus: —Nëido tantiac unësquo iquec. Ëmbi nabansho isnuec choash 3tedec ushquin piac ambi bëboed pete naimédaccosh. Ëmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash. ³³ Adsho tantiaishun abéd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoaquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho ³⁵ tantiaishumbien

abi datsidadquido chuiquin: —Nëmbo tabadbud —capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash. ³⁷ Aden pemiac abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi. ³⁸ Esusën pemiaido dadpenquo icpondash. Tambanac 4000tedi dada icpondash. Chido bacuëbobëdta tambanambo iccondambi. ³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

16

*Saduseyobon: Èbi isme, quiaid
(Mad 8.11-13; Duc 12.54-56)*

¹ Pudundoanec nidshobi anocquidon abi chieshënquidon Esus chuituidpondash. — “Nuquin Papan chomiaid nebi,” quequin comapenen tantiaquin nabanquin ëbi isme —cabededpondash padiseyobobëdtan saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquo badiadec,’ quequid.

³ Badiadnubi abu inchëshpambo icsho isash:

‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiachimboen bēdamboen tantiatiadquidi Nuquin Papan nēbimbobi naid mimbi tantienquoiquec. ⁴ Icsambo icquid icquimbi mimbi: “Ēbi isme,” cadednepec. Nēbi mibi ismenquoiquembi. Nuquin Papan nuquin tsusedpa Onas chishcambiecquid dapan chebudacshodaēdec ushun ucbudmiacbimboec unēs uacsho chococac daēdec ushash uincuenendabi. Aden ēbi tantiesabo ismendambi –quianec nidpondash Esus.

*Padiseyobon chiaid tantienda, quiaid
(Mad 8.14-21)*

⁵ Adanec nidec chian budash cano antabēdtoshon chian poteoapondash. Chian potequien Esusbēd icquido: –Pete nianchitombi. Bētiadquidi nepobi –quepondash. ⁶ Adshobien Esusēn abēd icquido chuiquin: –Padiseyobēdtan saduseyobon naid pan bidiscametebimboecquid iqueque. Ista –caquien ⁷ tantienquoio yec abēd icquido nadec onquecuededpondash. –Nuqui niamboed pete chiequi nepanui –quepondash. ⁸ Adsho ambembi tantiash Esus: –Ēbi bēdiactsēc tantiatsēcquid mibi nec. ¿Mimbi pete niamboed chiectabi nedi? Padenquoio. ⁹ ¿Bēshunashta mibi nepe? Pete 5tedtsēcboedi ěmbi 5000tedi pemiaidēn napi uaid dadpen iccondaid ¿tantienquioda yano? ¹⁰ ¿Adembidi pete 7tedi ictsēcboedi ěmbi 4000tedi pemiaidēn napi uaid dadpen tsitsanēn sandoboed tantienquioda yano? ¹¹ ¿Aden comapenen tantiaquid icquimbidambi pete niamboed chuipadi? Padenquoio. Pan

bidiscamete pictsäc cabiunac pan abichobi nua bidisquiachimboecquid padiseyobobëdtan saduseyobon chiaid iquec —quepondash Esus.

¹² Aden chuisho tantiash abëd icquido nadpondash. —Pan chienquo icquimbi nuquin mat-ses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

*Nuquin Papan Mado mibi nec, quiaid
(Mad 8.27-30; Duc 9.18-21)*

¹³ Adash yuectaniash puđuanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ġtsutsi ëbi caosh? —caquien: ¹⁴ —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. ¹⁵ Adsho tantiashun Esusën: —Ma mimbibi. ġtsutsi ëbi mimbi cao? —caquien ¹⁶ Petedo Simon caidën: —“Quidistu caid Nuquin Papan chomiaidquo nec,” caombi mibi. Aton Madombo mibi nec —capondash.

¹⁷ Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien

mibi nec. Adquid icquimbi matsesën tanti-aid chienquo icquin Nuquin Papan tantiami-aidquo mimbi abimbo chioc. ¹⁸ Tantia. Ęmbitsen mibi chuinu. “Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yac bimboec chieshtoenquo icquid iquendac,” queshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. ¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac — quepondash Esus Petedo chiec.

²⁰ Adashic abëd icquido abitedi chuioaic: — “Nuquin Papan chomiaidquo nec,” quequin ut-sibo ëbi chienda — quepondash Esus.

*Abi unës uate Esusën chiaid
(Mad 8.31-9.1; Duc 9.22-27)*

²¹ Adshumbic tauaquin abi unës uate chuidon-dash. — Shubu dadpen icquid Edusaden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidtedishun mëyanquoquin ëbi unës uamendac. Adoacsho chococac daëdec ushash uincuenendabi — quequin chuisho ²² tantiashun Petedon uanotantsëcquin tsadumbudshun Esus chuipondash. — Unësquo icnuc mimbi chieque.

Aden chienda. Ma mibi unës uatiapimbo icpayoc –capondash Petedon. ²³ Adoaquien Esusën: –Satanasën oncamiac Petedo adec onquec –queshun Petedo isquin Satanas chushcapondash naden. –Cuen, Satanas. Nuquin Papan chi-aid mimbi ëbi niacmetiadquo iqueque. Cuen –quetanec Petedobi chiec: –Matsesën tantiaid chuiquimbi Nuquin Papan tantiaidquo mimbi chienquo iccoc –capondash.

²⁴ Adashic abëd icquidotedi chuioaic: –Ëbi tantiaquidon aton nauidi nainquo icquin ëmbi chi-acpadomboen natsiash. Adsho chieshëmëncquidon: “Unës uachitomane,” cac chieshtoenquo icquin ëbi tantiatsiash. Adquid ëbi tantiaquidquo nec. ²⁵ Padnuen ëbi tantiatsëcquid: “Esus tantiasho unës uachitoshe,” quiash ëbi tantienquo yanec unësash Nuquin Papan cuidaidobëd nidendac. Padnuen chieshtoenquo icquin ëbi tantiaquid Nuquin Papa yacno tabadendac. ²⁶ ¿Nuquin Papa tantienquo yec tabadecta matses bëdambo icpatsiash? Abi bunaidtedi bedquin Nuquin Papa tantienquo yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? ²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquo yec ic-

saquido icsano nidmendambi. ²⁸ Tantia. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

17

*Esus bëchamauanquiecsho isaid
(Mad 9.2-13; Duc 9.28-36)*

¹ Aden chiashtedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc buanash macuësh dapa dectatoash mananënquio tabadtuidpac caondash. ² Tabadtuidshun isquien Esus utsiachimboec isadpec. Aton dashcutebëdi aton bëtantete ushëbimboec bëchamauanquiec yanac caondash.

³ Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴ Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icho. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi ⁵ abu ushu bëchamauanquiec icquidën isadenquio icnuc bëtimpac caondash. Adnubien abu ushu nënantanuëshquio Nuquin Papa onquiampac caondash. —Nëid con Madombo nec. Ëmbi tantiaidquio yec ëmbi bëdamboen isaidquio neque. Nëidquio tantiata —quec dacuëdampamboec onquenubien ⁶ uinte paëdtampamboec dacuëdtanec uebudcuededpac caondash Petedo chedo.

⁷ Adshobien Esusën camishquin: –Dacuëndenda. Nidto –cac ⁸ nidtoquin isquien Esus abentsëqui iquec.

⁹ Adtanec macuësh budequi Esus: –Mimbi isboed nëbi utsibo chienda. Unës uac ëbi uincuenacsho isun chianta –quepac caondash abëd icquido chiec.

¹⁰ Adsho tantiash Petedo chedo: –“Nuquin Papan chomiaidquo nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh –queshobien ¹¹ Esusën: –Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. ¹² Adquid Ediasbimboecquid chondash. Choacsho tantienquo icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac –quesho tantiashien: ¹³ –“Ediasbimboecquid nec,” quequinshenda chuiposh. Uan pado acten mentoanded caquinshenda Edias capec –quepac caondash Petedo chedo.

*Madompi dapuedaid podobitsi icsa cuemiaid
(Mad 9.14-29; Duc 9.37-43)*

¹⁴ Bëchamuanquiec ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun

chuipondash. ¹⁵ —Con mado bēdamboen isquin bēdameta, Icho. Baded-badedquiec unēsaneccuēten pichiquianec. Adecbidi unēsaneccuēten mentoadtsenaccosh. ¹⁶ Mibēd icquidon bēdamete danquin bēuidombi. “Nē bēdame,” cac bēdamenuen tanuidosh. Bēdamenquio iccoshe. Mimbimbo bēdameta —caquien ¹⁷ Esusēn ambo icquidotedi chuipondash. —Ēmbi nadatiambo icquin nabanquin ismiaqui mimbi ēbi tantienquio iquec. Adsho isash chieshtoash cuentiadquio icchitebi. Adtiadquio yequi padenquio iquec nebique. Min mado beccho —cac ¹⁸ bēsho istanquin Esusēn podobitsi icsa chushcapondash. —Padi. Daicsa uainda —cac podobitsi icsa cuenubi madompi bēdampondash.

¹⁹ Adsho isun abēd icquidon Esus chuipondash utsibo tantiamenquio icquin. —Ēmbi: “Cuemenu,” cac ŷatotsi quiash podobitsi icsa cuenenquio icposh? —caquien: ²⁰ —Nuquin Papa bēdamboen tantiaquin mimbi bēdamboen natsenoc. Mimbi bēdiactsēc tantiatsec. Pete ēshēmpi mostasa caid pistsēcquidi siac nua yec canitsiash. Adecbidi Nuquin Papa tantiatsēcboedi: “Ambi natiapimbo ictequid nibēdec,” quequin abimbo tantiaquidquio yanshun comapenen tantiaquidbimboec mibi ictsiac. Adquidēn nēid macuēshquiobi cain: “Uquē manēd,” cac manēdtsiash. Aden mimbi: “Ēbi bēdamboen nameta, Papa,” quequin Nuquin Papa chianiac aidēmbi mimbi: “Ēmbi natiapimbo ictequid nec,” caid mibi bēdamboen nametsiash. ²¹ Nēbi ēmbi cuemeboed abembi cuentiapimbo icquid nec.

Nuquin Papauidi tantianuen buna mëmunquin
Nuquin Papa chianeshun adquid cuemequid
—quequin Esusën chuipondashi.

Abi unëste Esusën chuioaid
(*Mad 9.30-32; Duc 9.43-45*)

²² Adanec aton nidaid Cadidia yacnobi
capucuenequimbi Esusën abëd icquido
chuipondash. —Ëbëd icquid abentsëcshun ëbi
chieshënquido ëbi bedmendac. ²³ Bedshun
ëbi unës uamendac. Aden unës uamiacsho
chococaquini daëdec ushash uincuenendac
—quesho tantiatanequien abëd icquido: —
Unësquio icnuc chiec —quiash shubiantiadtsëcquio
icpondash.

*Chuiquid dapa menetequid piucquid Petedon is-
tuidaid*

²⁴ Aden chianec nidequi shubu dadpen
icquid Capednaun caid yacno Esus chopondash.
Adnubien Nuquin Papa tabadte shubu uashunaid
nacnemenuequin piucquid bedquidon Petedo
chuituidpac caondash. —Nuquin Papa tabadte
shubu uashunaid nacnemenuen ¿ada min
icbon dos dada uatsaid piucquid shocoshëmpi
abentsëc menepatsiash? —cac ²⁵ Petedo: —
Ai, menetsiash —quepac caondash. Adanec
nidec shubun puduedshobien Esusën ambia
Petedo chuipondash. —¿Atotsi mimbi chie,
Simon? Aton matsesën na nacnemenuen ¿tsutsi
chuiquid dapabon piucquid bedshumpec?
¿Ada aton matses piucquid bedshumpec? Aido
bedshunenquio icquin ¿ada ambi bedaido
aton yuabo piucquid bedshumpec? —caquien

²⁶ Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. ²⁷ Aden tantiaquimbi: “Nëishnushe,” queshun menenun nanuna. Chianën ansemetan. Tauaquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abëd icquidon Esus chuipondash. —Abitedishun Icho icquin matses mimbi namendac. Ëbi chedo caic ¿mitsicquid mibëdtan chuiquid dapa mimbi icmepatsia? —quesho ² tantiashun abi tabadacno nënantanquio bacuë tsaduntsëcshun Esusën chuipondash. ³ —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nacbimboen ëbi tantiaquiota. Adash ambi namiaid yanash Nuquin Papa yacno mibi puduedendac. ⁴ Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac. ⁵ Nadquid

bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac — quepondash Esus.

*Tantiabentsëcquido icsamete chiaid
(Mad 9.42-48; Duc 17.1-2)*

⁶ Adshumbic padpiden chiec: —Ëbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nēnepatecnēdan,” caimbi icsamiente bunquidquo.

⁷ Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mēdanten naic mibi icsaic. Mēteshuniac bedtiapimbo yachimboec icsainquo yec ënēdta. Taën capuec mibi icsaic. Tateshuniac caputiapimbo yachimboec icsainquo yec ënēdta. Ënēdenquo icsho Nuquin Papan mibi cuidendac.

⁹ Adecbidi ëshën isec mibi icsate bunquiec. Ëshë chicshuniacbimboec icsainquo yec ënēdacsho: “Bëdambo iquec,” catsiambi. Ënēdenquo icsho Nuquin Papan chian anēdënquiacno nēsecaindac —quequin Esusën chuipondash.

*Matses ëbi tantiamete Nuquin Papa bunaid
(Duc 15.3-7)*

¹⁰ Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquiobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo

dayun uaquid icquin Nuquin Papa yacno puduedshun mimbi mamënshumboed Nuquin Papa chui-nushe. Adtsëcquidëmpi mamënshunenda. Èbi tantiabentsëcquido con Pan tantiaquieque. ¹¹ Èmbitsen aido tantiembi. “Bënudaid istuidachimboen èbi tantienquo icquidobi èbi tantiaquido icmenu,” quiash matsesondabi –quepondash Esus.

¹² Adashic padpidec: –¿Mitsipadquo nuquin matses icpec? Nèish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. ¹³ Aden istuidash comapenec cuishonquequid: “Con yua nibëdantsenquiac,” quiash. Aton yua utsi yacno bëash abi icboctedi icsho isash bëdambo icquid. Adecbidi matsesën èbi tantiabensho isash Nuquin Papabëd cuishonquebi bënudaid istuidacimboec. ¹⁴ Icsaido cuidacno matses nidmete Nuquin Papa bunenquo iquec. Matses bëdamboen isquin abëd tabadmte Nuquin Papa bunquieci –quepondash Esus.

*Chieshënquidobëdi onquete chiaid
(Duc 17.3)*

¹⁵ Adashic padpidec: –¿Ada èbi tantiaquid utsin mibi icsa uaosh? “Ai, icsa uaoshi. Chieshëmiantiadquo icchitosh,” queshun nadoac bëdambo ictsias. Aid abentsëqui chuiquin aidbëd bëdamboec onquequin: “Èbi icsa uaqin Nuquin Papan chiaid mimbi niac-niaccoc. Adec icsainquo yec ënëdta,” mimbi cac: “Ai, adebi,” quiash mibëdi bëdamboec tabadtsias Nuquin Papa tantiesabimboec icuidboedi. ¹⁶ Mimbi:

“Icsainquo yec ënëdta,” caqui: “Padi. Adequi icsaibi,” qesho tantiashun ëbi tantiaquid utsi beduanshun aïdbëdtan chuitanta. “Nuquin Papan chiaïd niac-niacsho isun daëdshun chiaïd abimbo chiaïd nec,” quequin chiaïd tantiaquin adota. ¹⁷ Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec iccuededquido chuiquido chuituidta. “Mimbïtsen chuitanta,” cac aidontsen chiaqui tantienquo icsho isun: “Nuquin Papan chiaïd niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda. ¹⁸ Aden mimbi: “Esus tantiesabimboecquid neque. Cuëdënacno chomenquo ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquo yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹ Padpiden chuïnu. Tantiã. Mimbi: “Nuquin Papa chuïnuna,” cac: “Ai, adonona,” qesho tantiashun aïdbëdtan mimbi Nuquin Papa chianiac mimbi chiãpadomboen Nuquin Papan natsiash.

²⁰ Ëbi tantiec daëd tabadnuc aïdbëd con Mayan yec ëbëd yãbimboec tantiãdendãc. Adec tabadsho isun: “Con Mado tantiãquido nec,” qeshun aidon chianiaïd Nuquin Papan tantiãdãc.

Yuan bëdamboen istiãpimbo yaïd

²¹ Adec: —Icsa uanec chieshtomiantiadquïo iquëc —Esus qesho tantiashumbien Petedon Esus chuïpondash. —¿Icsa uanec

chieshtomianquid tedentsimbi chieshenquo
icquin bēdamboen ispe? Chieshēnquin padpiden
icsa uac ¿padpidendambi bēdamboen isoape?
¿Mēdante utsiuc daēd tauadoquin sietetedembi
nashun padpiden bēdamboen isenquo icquin
ēnacta bēdambo icpatsiash? —caquien ²² Esusēn: —
“Mēdante utsiuc daēd tauadoec sietetedi” quequin
daēdpactsēcquo mimbi chuipec. 70 por 7 caid
¿tedtsi icpec? Aidteden 490tedembi ēnenquo
icquin bēdamboen isoadoniac bēdambo ictsiash
—quepondash Esus.

²³ Adashic abi onquec: —Nuquin Papan chiac-
padomboen matses bēdamboen iste mibi chuinu.
Tantia. Tsusion yuabo dadpen icpac caondash.
“Ma bēnu,” quequin ambi meniactedi piucquid
bednuen aton yuabo aton shubuno chomepac
caondash. ²⁴ Abia chomiaidēn piucquid dad-
penquioshē bedshun aton icbo meniambo icpac
caondash. ²⁵ Adsho icbon: “Mimbi bedactedi
beccho,” cac: “Nibēdec,” quepac caondash yua.
Adshobien icbon: “Aidtedi piucquid bednuen
matses utsibo mibi yuamenu. Min chido min
bacuēbobēdtabi cuēsh-cuēshēdmeshun aidtedi piuc-
quid bednu. Mibi icsambo iqueque,” cac ²⁶ yua abi
yuaquid ismequin danēshēn sebudash: “Padi. Ēbi
yuamenuen cuēsh-cuēshēdmenda. Chiata. Yuec-
shun aidtedi bedshun mibi menenun nanu,” ca-
pac caondash. ²⁷ Adoaquien icbon bēdamboen
isquin: “Padi. Ēbi menenda. Mibi utsibo yuamen-
quo iquembique. Dacuēdenda. Nidec nid,” que-
quin icbon aton yua bēdamboen nidmepac caon-
dash.

²⁸ Adoac nidquimbien aid yuan icbon

bëdamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin têtëdinquin: “Mimbi bedactedi piucquid beccho. Unës uachitomane,” caquien ²⁹ aidtsen ambi piucquid bedshunondaïd ismenuen danëshën sebudtsec: “Chiata. Èbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiashun icbon bëdamboen isboedëmbi chieshënquin: “Padi. Mibi cuidmembï,” qeshun quënën nauedmepac caondash. “Piucquid aidted abi menianenquïo yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi quënën nauedmiac: ‘Piucquid menianenquïo ìquec,’ qeshun,” quequin icbo chuipac caondash. ³² Adsho tantiashun icbon ambi cuidenquïo icquin bëdamboen isboed chomeshun chushcapac caondash. “Icsambo icquidquïo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bëdamboen isombi. ³³ ¿Èmbi mibi adobocpadomboen utsi bëdamboen istiapimboda icco? ‘Ma bënu,’ qeshun mimbi meniactedi bëabi icsho bëdamboen isec mibitsen bëdambo ictsenac. Mibi yacpadeç nëishun mibi cuidembï,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquïo meniash ma puduempãnu,” qeshun quënën

nauedmiac caondash. ³⁵ Aden matses yuan
 icbon nacpadomboen Nuquin Papan naindac.
 Utsibon chieshënaqui chieshënansho Nuquin
 Papan mibi bëdamboen istiapimbo iqueque.
 Chieshënanenda. Mibi chieshënquidobi bëdamboen
 ista –quepondash Esus.

19

Chidobëd cuëshëdte Esusën chiaid
(Mad 10.1-12; Duc 16.18)

¹ Adanec nidaid cuëshë Cadidia caid yacnuësh
 puduanec nidec nidaid cuëshë utsi Udeya caidën
 nidquin acte Odan caid potebidanec Esus nid-
 pondash. ² Adec nidshobien matses dadpenshun
 tsibanampondash. Abi tsibanansho isun nidtuid-
 shun daicsaidtedi Esusën bëdamepondash.

³ Adnubien tsusedpabon chiampid namequido
 padiseyobon chieshënquin: –Nuquin Papan chi-
 aid niacmenu –quequin Esus chuituidpondash. –
 ¿Atotsi mimbi chuipe? Dada uashun aton chidobi
 nidmete ¿mitsipaden mimbi chuipe? En chui. Tan-
 tianu –capondash.

⁴ Adoaquien Esus: –¿Nuquin Papan chiaid
 isamboda ictio? “Nuquin Papan dadaba uashun
 aton chido uapampic,” quequin dada uaid ma
 mimbi ispaboc. ⁵ Adembidi: “Dadan canite
 chido uaid icsho dadan aton chido bedquid.
 Amë chedobëd icboedi aton chido bedash aid
 nianenquio yec aïdbëd tantiananquiec dada
 aton chidobëd abentsëc yacbimboec tabadquid,”
 quequin dada uaid ma mimbi ispaboc. ⁶ Aden
 Nuquin Papan tantiacpadomboen aton chido
 nianenquio yec aïdbëdi tantiananquiec abentsëc

yacbimboec tabadac bēdambo ictsiash. Padnuen aton chido nianec aïdbēdi cuēshēdquin Nuquin Papan chiaïd niactsiash. Adecbidi chido aton bēnē nianec icsaquïd —Esus quesho ⁷ tantiashumbien abi chieshēnquïdon: —¿Abimboda mimbi capadi? Nuquin Papan chiaïd dada uaquin ¿atotsieshun Moisesēn naden chuipampic? “Aton chido bunenquïo yanshun dadan naden dada uashun menequïd. ‘Mibi intiapimbo yanobi,’ quequin dada uashun aton chidobi menequin nidmequïd,” quequin Moisesēn dada uapampid ma icpayoc — quequin chuïpondash Esus chieshēnquïdon.

⁸ Adsho tantiashun Esusēn chuïpondash. — Ai, Nuquin Papan chiacpadec aton chidobēd bēdamboec tabadiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiambo icpampic. ⁹ Tantia. Mibi chuïnu. Aton chidobēd cuēshēdshun chido utsi bedquin Nuquin Papan chiaïd niactsiash. Padnuen aton chidon bēnēpenquïo chudmesho istuidash aïdbēd cuēshēdquin Nuquin Papan chiaïd niaquenquïo ictsiash — quepondash Esus.

¹⁰ Adnubien abēd icquïdon: —Adotiapimbo icte mimbi chuïpec. Aton chidobēd cuēshēdenquïo icte mimbi chuïsho tantiashun: “Aton chido bedesambo dada bēdambo ictsiash,” caïmbi — quepondash abēd icquïdo. ¹¹ Adsho tantiash Esus: —Ai, utsi-utsiec pabiate shēcuē nibēdacimboen ēmbi chiaïd tantiatiapimbo iquec. Utsiboen aton chido bedash Nuquin Papan chiacpadec bēdamboec tabadquïd nec. ¹² Utsibic mimbi chiacpadquïd chido bedesa iquec. Nēïdtedi chido

bedesa iquec. Nēidic aton padibi impadishtsaid. Nēidic matsesēn inicsa uaid. Nēidic: “Nuquin Papan yuambo icquin aidēn chiapadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ēmbi chuiboed tantiashun ěmbi chiapadomboen nac bēdambo ictsiash —quepondash Esus.

*Esusēn bacuēbo chiaid
(Mad 10.13-16; Duc 18.15-17)*

¹³ Adnubien Esus ismenuen bacuēbo bē-bēpondash. —Mamishquin ma Nuquin Papa Esusēn chuinu —quequin bē-bēsho isumbimbi: —Padi. Bēenda —cauidpondac. ¹⁴ Adshobini Esusēn: — Chēn. Ma bēnu. Cuemenda. Bacuēbimboecquid Nuquin Papa yacno puduedtequid nec. Amēn chuisho tantiash bacuē badedi: “Abimbo caic,” quiacimboen ěbi tantiaquid Nuquin Papa yacno puduedtequid nec. Bacuēbo bēdambo iqueque. Beccho —cac bē-bēpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquio dayun uaquid Esusbēd onquiaid

(Mad 10.17-31; Duc 18.18-30)

¹⁶ Adnubien dada caniampinguio Esus chuitu-idpondash. —Mibi bēdambo iquec. Bēdamboen chuiquidquio mibi neque. Ēbi chui. Padpidec unēstiapimbo icquid icmenun bēdambo icquid Nuquin Papan abi yacno puduedmetsiash. ¿Atotsi nasho Nuquin Papan ěbi bēdambo capatsiash? —caquien ¹⁷ Esusēn: —¿Mitsipadquid bēdambo icquid cai? Nuquin Papauidtsēqui bēdambo icquid

nec. Aibdëd tabadnuen ambi Moises dada uami-ampictedi nata –capondash. ¹⁸ Adoaquien cania: –Nuquin Papan chiaid ¿mitsipadquid cai? –quesho tantiashumbien: –Naden chiaid caimbi. “Cuesunenda. Min chidopenquoio chudenda. Min bënëpenquoio chudmenda. Ampenda. Muainda. ¹⁹ Titabëdta papa chieshënenquoio icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi –capondash Esusën. ²⁰ Adsho tantiash cania: –Aidtedi niaquenquoio icquin nabanquidquoio nebi. Bacuëctsäc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi –quepondash.

²¹ Adsho tantiashumbien Esusën: –Nuquin Papan chiaid niaquesambo ictiadquoio icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istiashe. Adota. Adotanequic ëbëd iquec cho –caquien ²² cania: –Con na dadpenquoio icsho uesquin menetiapimbo iquebi –quiash shubiantiadtsëcquoio ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. –Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec. ²⁴ ¿Ada nëishamën pinchuc chichte ancumpadic? Padenquoio. Adecbidi aton na dadpenquoio dayun uaquidën aton nauidtsëqui tantiaquin ëmbi

chiacpadomboen natiapimbo yec Nuquin Papa yacno tabadtiapimbo iquendac –quequin Esusën chuipondash.

²⁵ Adec: –¿Ada nëishamën pinchuc chichte ancumpadic? –quesho tantiashien abëd icquido nadpondash. –¿Tsudain Nuquin Papa yacno puduedtequid icchitotsiash? Nibëdchitequien iquec –quesho tantiashumbien ²⁶ Esusën abëd icquido bëisquin naden chuipondash. – Matses namiantiapimbo icnuc Nuquin Papain namianquidquio nec. Ambi natiapimbo ictequid nibëdec –quepondash.

²⁷ Adsho tantiashun Petedon: –Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? –caquien

²⁸ Esusën: –Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Ëbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. ²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio

icnuc. ³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquo iquendac. Utsibic nëuëshquo chuiquidpenquo icboedi Nuquin Papa yacnoshon: “Bëdambo icquid nec,” quequin chuiquid dapa icmendac –quepondash Esus.

20

Chonoadquido chiaid

¹ Adshumbic abëd icquido Esusën ompoacbinboen chuipondash. –Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³ Ushë abucquo yanubi tied icbon pete meniacno nidshun utsibo nainquo yec samëdsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac ⁵ tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. ⁶ Inchëshbudtsëqui nidoaquin utsibo nainquo yec samëdsho istuidoashun: “¿Atotsi quiash samëduidequi ique?” cac ⁷ samëdquido: “Chonuaanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneopac caondash inchëshbudtsëqui neshcaquin tauaic.

⁸ Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ënquimbi meneta,” cac menequin tauapac caondash. ⁹ Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquio piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” qeshobi aidtedtsëcbidi piucquid menepac caondash. ¹¹ Aidtedtsëcbidi meniaquien tied icbo chushcapac caondash. ¹² “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquiec iquec. Ëbi dadpen meniac bëdambo ictsiash,” quequin chushcapac caondash.

¹³ Adoaquien tied icbon: “¿Chieshanquiectabi ique? Ëmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc. ¹⁴ Mimbi bedboed buanec nid. Ëbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵ ¿Icbon ambi tantiacpadom-boen aton na dadpen meniac ada aid icsambo

icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bēdambo iquec?” quequin tied icbon chuipac caondash —quequin ompoacbimboen chuipondash Esusën. ¹⁶ Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusën.

*Abi unēste Esusën padpiden chuioid
(Mad 10.32-34; Duc 18.31-34)*

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abēd icquido 12tedi icquid chuinen uanotantsēcquin buampondashi.

¹⁸ Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshēnquido ëbi bedmendac. Nëish yua abided unēs uaquido chuiquid dapabobēdtan Moisesën dada uampid chuibanquidon ëbi bedshun: “Ma unēs uamenu,” queshun ¹⁹ matses utsibo isadaidpembo ëbi bedmendac. Aden bedmiac matses utsibon mamēnshunquin ëbi cueshcaten comapenen cueshcaindac. Adshumbic ëbi unēs uanuen cuesten dectanendac. Aden unēs uaqi daēdec ushash uincuenendabi —quequin Esusën abi unēs uate padpiden chuiopondashi.

*Uanën titan chiaid
(Mad 10.35-45)*

²⁰ Adnubien Sebedeyon chido Uanën titan Esus chuituidpondash. Uambēdta Acobo aton mado daēdi bēshun ismequin danēshēn sebudtanquin chuipondash. —Ēmbi chiacpadomboen ëbi

nashunta, Icbo –caquien: ²¹ –¿Atotsi cai? – capondash Esusën. Adoaquien: –Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta –caquien Esusën: ²² –Ëmbi naid tantienquo icquin mimbi chuipec –quequin ani chuishumbic Uanbëdta Acobo Esusën chuipondash. – ¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? –caquien Uan: –Ai, chieshtoenquo ictsiabi. Mibëd mëyadtsiabi –quepondash.

²³ Adsho tantiashien: –Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac –quequin Esusën chuipondash.

²⁴ Adnubimbi: –Chuiquid dapa ëbi icme – Esus casho tantiashun Uan chedo nëishëmpondac.

²⁵ Adsho Esusën ëbitedi chuipondash. – ¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. ²⁶ Ëbi tantiaquido icquin mimbi adoenuquo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac.

²⁷ Bëdambo icquid ictiadquo icquin yuan aton icbo nashunachimboen mimbi utsibo nashuntsiac.

²⁸ Adembidi Nuquin Papan matsesmiaid icquin matses nashunquid nebi. Ancainquo icquin

matses tantiaquin Nuquin Papa icsaquidobi
cuidmenquoio icnuec ëbided cuidadec unësendabi
—quequin Esusën abëd icquido chuipondash.

*Bëshuaid daëd Esusën bëdamiaid
(Mad 10.46-52; Duc 18.35-43)*

²⁹ Adashic yuecquoio ictanec shubu dadpen ic-
quid Edico caid yacno tabadash auëshquiobi Esus
nidpondash. Adsho isanec nidquin matses dad-
penshun Esus tsibanampondash. ³⁰ Adnubien
aid podqued cuëman bëshuaid dada daëd tsad-
pondash. —Esus cuenec —quesho tantiashien
aid daëdi comapenec cuëdpondash. —Tsusedpa
Dabidën tsyuecquid Nuquin Papan namiaidquoio
icquin ëbi bëdamboen ista, Icho —quepondash Esus
caic.

³¹ Adsho tantiashun matses dadpenshun chush-
capondash. —Padi. Chën. Adec cuëdec chieshan-
quiec mibi iqueque —caquien abi niacbidanec
buëdanquiec cuëdpondash. —Tsusedpa Dabidën
tsyuecquid Nuquin Papan namiaidquoio icquin ëbi
bëdamboen ista, Icho —queoapondash.

³² Adoaquien Esusën nidtuidshun ëcbedpondash.
—¿Atotsi chuinuec ne? —caquien: ³³ —Isbente
bunquiebi, Icho —quepondash. ³⁴ Adsho
tantiash: —Unësquio iquec —quetanquin Esusën
bëshuaid daëdi bëmishpondash. Adoac abi
daëdi bëdampondash. Bëdanshun aidëntsen Esus
tsibanampondash bëshuacboedëmbi.

*Edusaden yacnoshon chuiquid dapabimboec-
nuc Esus bëdamboen isaid*

21

*Edusaden yacnoshon chuiquid dapabimboec-
nuc Esus bēdamboen isaid*

(Mad 11.1-11; Duc 19.28-40; Uan 12.12-19)

¹ Adanec nidequi shubu dadpen icquid Edusaden caid anoentsēqui macuēsh dapa Odibos caid poctse shubu daēdpactsēcquid Bedpaque caid yacno Esus nidpondash. Adshumbic anoentsēqui choshon abēd icquido daēd chuipondash. ² — Nēid podquedēn nidquin shubu daēdpactsēc yacno nidshun cabayobitsecquid aton bacuē caniatsēcbēdta mimbi badedquoio istuidendac. Istuidshun tēnēshaid tēdiadsho tēchicta. ³ Mimbi tēchicsho isquidēn: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac: “Ai, buantan,” quendac —quequin Esusēn chuipondash. ⁴ Ambi Esusēn nate chiaid Nuquin Papan con tsusedpa dada uamiampicpadomboen nanuen Esusēn adopondash. Naden dada uapampic.

⁵ “Shubu dadpen icquid Sion caidēn tabadquido chui. Edusaden cain Sion capec.

‘Is. Mibi chuiquid dapa cabayobitsecquidēn bacuē caniatsēc catsadtoash choeque. Ancanen-quoio yec bēdamboshē icquidquoio neque. Is,’ quequin chui,”

quequin dada uapampic. ⁶ Aden dada uampicpadomboen ambi: —Bedtan —caidon bedtampon-dash.

⁷ Adotanquin cabayobitsecquid anibēdta caniatsēc bēacshobimbi con dashcute bēntse dasiuid-boed chictanquin casanondac. Aden ěmbi cabay-

obitsecquid casansho isash caniatsëquën Esus catsadtopondash.

⁸ Adanec nidsho istanquin matses dadpeshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun. ⁹ Matses dadpen bëyuc nidnubi aidtedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid
Nuquin Papan namiaid yec mibi
bëdamboshë iquec.

Nuquin Papan chomiaid yec mibi bëdamboshë
iquec.

Mibi chomequid Nuquin Papatsen bëdamboshë
iquec. Adeduya,”

quec cuëdëncuededpondash.

¹⁰ Adec Edusaden yacno matses dadpenquoio cuëdënidec nidsho isashien Edusaden yacnocquido: —¿Tsutsi tantiec cuëdëncuededpec? —quepondash. ¹¹ Adsho tantiashun Esusbëd

nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(Mad 11.15-19; Duc 19.45-48; Uan 2.13-22)

¹² Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio

yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” queshun pichicametsiash —quequin aton nëish yua menequin piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenuo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic

cuëdëncuededsho tantiash nëishquiopondash.
 16 Adshumbic: —Icsambo iquec —queshun Esus
 chuituidec: —¿Ada bacuëbo cuëdënsho tantio?
 —caquien: —Ai, tantiombi. ¿Nuquin Papan
 chiaid isabida ictio? Naden bacuëbo cuëdënte
 chuiampic.

“Nuquin Papan oncamiac bacuëmpin aton bacuë
 utsibëdtan:

‘Nuquin Papa bëdambo iquec,’ caindac.”

quequin chuiampic —quepondash Esus.
 17 Adanec nidec shubu dadpen icquid Betania
 yacno nidash ushtuidpondash.

*Esusën cuëte unës uaid
 (Mad 11.12-14, 20-26)*

18 Badiadnubi ënden auchbidi nidoaic Edusaden
 yacnobidi nidoapondash. Piabi nidec bundoshon
 19 podqued cuëman nidquid cuëtempi icueda caid
 istuidash: —¿Ada bacuëaye? Chenun isbono —
 quepondash Esus. Adshun isquien bacuë nibëdec.
 Podouidquio icpec. Adsho isumbien Esusën:
 —Adequi bacuëesambo yec unësta —capondash.
 Adoac badedquio unëspondash.

20 Adosho isun abëd icquidon: —¿Atotsi quiash
 badedquio unësposh? —caquien 21 Esusën: —
 Tantia. Mibi chuinu. Adembidi mimbi natsiac.
 “Nuquin Papan ambi chiaid nainquien icchitec,”
 quenquio icquin: “Nuquin Papan ambi chiac-
 padomboen naquidquio nec,” quesahun mimbi
 Nuquin Papa chianesho aidëmbi mimbi: “Nati-
 apimbo iquec,” caidi mibi nametsiash. Aden
 tantiaquin mimbi nëid macuësh cain: “Mananuc
 tabadboedi adquiecbidi acte nantan tabadoata,”

mimbi cac nëid macuësh acte nantan tabadoat-siash. ²² “Ambi chiacpadomboen naquidquo Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash — quequin Esusën abëd icquido chuipondash.

¿Tsuntsin: Naic nid, cac nai? quequin Esus chuimiaid

(Mad 11.27-33; Duc 20.1-8)

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tiantianu —caquien ²⁴ Esusën: —En mimbia chui. Èmbia tiantianu. Mimbi chuisho tantiashun ëbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoaquien badedquo chienquo yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquo Uan pado nepadenec,” cac Esusën: “¿Atotsieshun aidën chiacpadomboen nainquo ique?” canushe. Aden chienquien ictiad. ²⁶ Nuqui: “Ambembi napondash,” qesho tantiashun nëmbo icquidon nëishënushe: “Nuquin Papan namiaid Uan pado niondash,” qeshun. Aden chienquien ictiad — quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. ²⁷ Adashien Esus padpiden chuioaic: —Tsaudi. ¿Tsundan chiaquien nachitondash? —qeshobien: —Mimbi chienquo

icsho tantiashun ëmbitsen ëbi namequid chienquo iquemi —capondash Esusën abi chieshënquido cuidquin chuiquin.

Mado daëdshun nachimboecquido chiaid

²⁸ Adshumbic Esusën padpiden chuipondash. —Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiaash neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquo icpac caondash.

³¹ ¿Mitsicquidën aton papan chiacpadomboen napac caondash? En chui. Tantianu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacbimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquo iquec. ³² Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquo icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi

icsaid ëntiadquidi mimbi ënenquoio iccondac. Aton papan chiaid niacquidbimboecquid mibi nec —quepondash Esus abi chieshënquido chiec.

*Abi chieshënquido icsaid Esusën chuioaid
(Mad 12.1-12; Duc 20.9-19)*

³³ Adshumbic Esusën abi chieshënquido ompoacbimboen chuipondash naden. — Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacenmpac caondash. Adoshombic: “Ampequid chosho isnu,” qeshun shubu abucquoio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴ Adash yuectaneshumbien abëd nidondaido aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboedtedpenquoio dadpenquoio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash. ³⁷ Adoacsho tantiash aton madombo caic: “Bedtan,” quepac caondash. “Con mado cuesunenquoio icquin ëmbi chetequid menetsiash,” qeshun aton madotsen nidmepac caondash. ³⁸ Adoac nidec aton papan tiedno choacsho chetequid cudasquidon: “Tied icbo

unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashë,” qeshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. —Ëmbi chui-boed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho ⁴¹ tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cud-asënesambo utsibo aton tied neshcametsiash —quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquio shubu uanun nitsinembi,’ quetiadquidi isuidacbimboen Nuquin Papan namiaid chieshënac.

Aden buintad isuidaidsin bedshun shubu uanun nitsinacbimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,”

quequin dada uapampic. ⁴³ Aden ambi namiaid ëbi chieshënsho isash mibi caic Nuquin Papan nadpec. “Ëmbi con matses caid isadaidbo ëbi bëdamboen tantiametiadquidi chuiquid dapabon namenquio icsho isun utsibotsen:

‘Ëbi chuiquid icta,’ caindambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuête uebudquin catashac canite uesadec podquëd-podquëdadbimboecnuc mibi comapenen cuidendac –quepondash Esus abi chieshënquido chiec.

⁴⁵ Adsho tantiashun padiseyobobëdtan nëish abided unës uaquido chuiquid dapabon: –Nuquien cachitec –quequin tantiabempanëdash.

⁴⁶ Adshumbic Esus cuesunemenuen bedtiadquio icquimbi bedenquio icpanëdash. –Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe –qeshun aton matses dacuëdënquin bedenquio icpanëdash.

22

Cacuidanaid chiaid

(Duc 14.15-24)

¹ Adshumbic Esusën padpiden ompoacbimboembidi chuipondash naden. ² –Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaaid mibi chuinu. ³ Chuiquid dapan aton yuabo chuiquin: “‘Con icbon madon chido bedequè. Aidbëd cuishonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquio icpac caondash.

⁴ Adsho isumbien chuiquid dapan aton yua ut-sibo chuiquin: “Nëish nua bëchichoquidquio dadpen codoquiaccoshe. Padpiden chuitan,” cac chuitanoaqui ⁵ choenquiobidi icpac caondash.

Adec cacuidanquiec abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. ⁶ Utsimbic abi: “Pec cho,” cashobi yuabo mëyanquin cuesun secapac caondash.

⁷ Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash.

⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹ Ëmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun ¹⁰ ambi istuidaidtedi chuibenetanac matses dadpenquio pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquio yec.

¹¹ Adshun chuiquid dapantsen puduedshun isquien dashcute bëdaidquio dasiuidabi icquid abentsëc tsadtsec. ¹² Adshobien chuiquid

dapan: “¿Atotsi quiash dashcute bëdaidquio dasiuidambobi cho, buchi?” caqui ëcbedenquio yec tsadec. ¹³ Adshobien chuiquid dapan: “‘Chido bedacno isnuec dashcute bëdaidquio dasiuidquid,’ quepadenec. Mibi icsambo iqueque. Mibi cuidnu,” queshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquiec natiaic shubiquiopac caondash.

14 Adembidi Nuquin Papan ambi matses bēdamboen iste dadpen tantiamiaqui utsin-utsinquier tantienquo iquendac. “Abi yacno puduednu,” queuidboedi bēdambo icte bunenquo yec abi tantiatipimbo icsho Nuquin Papan comapenen cuidendac. Utsi daēdpactsēquier Nuquin Papan tantiacpadec abēd tabadtequid iquendac –quequin Esusēn chuipondash.

Chuiquid dapa piucquid menete chiaid
(*Mad 12.13-17; Duc 20.20-26*)

15 Adsho tantianec nidash abi chieshēnquido padiseyobo: –Esus icsamboen chuimenuna. Icsamboen chuisho tantiaashun bedshun unēs uamechitono –queshun ambi chuibanquin tantiamiaido chuipac caondash. 16 –Icsamboen chuimetan –caquier chuiquid dapa Edodes caid tantiaquidobēdtan icsamboen chuimenuec chochoshon chuituidpondash. –Bēdamboen chuiquid mibi neque. En ēbi chui. Tantianu. Muesambo icquin Nuquin Papan chiacpadec bēdamboec tabadte mimbi abimbo chuipoc. Matses dacuēdēnenquo icquin Nuquin Papan chiaidquo mimbi chuipoc. 17 Adquid icquin ¿atotsi mimbi chuipe? Tantianu. Chui. Nuquin matses yuaquid chuiquid dapa Sesad caidēn: “Piucquid shocoshēmpi dadpen beccho,” cac nuqui meniac ¿ada bēdambo icpatsiash? –capondash. 18 Adoquier Esusēn ambembi tantiaashun: –Bēdambo icquid damianquiec mibi muambo nec. ¿Atotsieshun ēbi icsamboen chuimetiadquo ique? –quetanquin: 19 –Chuiquid dapa menetequid piucquid shocoshēmpi beccho –ambi cac

²⁰ bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmédquidbèdta dada uac? En chui. Tiantianu —caquien: ²¹ —Ma nuqui yuaquid chuiquid dapambo Sesad neyoc —quepondash. Adsho tantiashumbien Esusën: —Abibimboecnuc dada uaid abi cuëmédquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta —quequin Esusën bédamboen chuipondash. ²² Adsho tantiash icsamboen chuimetiadquio icboedi: —Bédamboen chuipec —quetanec nidanepondash.

*Matses uincuemete chiaid
(Mad 12.18-27; Duc 20.27-40)*

²³ Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec chochopondash. ²⁴ —Bédamboen chuiquidquio mibi neque. Mimbi chuisho tiantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësaçsho aton utsin aid chido bedshun: ‘Con buchin bacuëbo nibèdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. ²⁵ Aid tantiaquin chuinu. Dada aton utsibobèd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash ²⁶ bacuë tishmiambobidi unësoapac caondash.

Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiatic ¿mitsicquidën chido icpatsiash? — caquien ²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemetete mimbi tantienquio iqueque. Chuïnu. Tantia.

³⁰ Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiaido iquendac. Aden uincuemiaidën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemetete chuiquin Nuquin Papan dada uamepampid ¿isbanabida ictio? Ma mimbi aid isbampaboc. ³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unëssh aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: — ¿Mitsipadquid nepec? Bëdamboenshëen chuipec —quepondash.

*Moisesën dada uampid chiaid**(Mad 12.28-34)*

³⁴ Aden unësaid uincuemete chuisho tantishumbien Saduseyobon padpiden: — En chui —cainquo icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash.

³⁵ Cho-choquin abentsëcshun Nuquin Papan Moises dada uamiampid tantiaquidquo icquin chuimetuidpondash. ³⁶ —Chuiquidquo mibi neque. En ëbi chui. Tantuanu. Nuquin tsusedpa

Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboeshë iquec,” capatsiash? —caquien

³⁷ Esus: —“Nuquin Papa tantiaquiec ambi chiacpadec tabadte bunquiota,” quequin

³⁸ chiampidba naic Nuquin Papan chiacpadec mibi bëdamboec tabadtsiandac. ³⁹ Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadacbimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. ⁴⁰ Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënquido chuiquin.

*Nuquin Papan chomiaidquo chiaid**(Mad 12.35-37; Duc 20.41-44)*

⁴¹ Adshumbic Esusëntsen abi icsamboen chuimete bunquido Padiseyobo chuipondash.

42 –Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? –capondash Esusën abibi cadquimbi. Adoaquien badedi: –Nuquin tsusedpa yampid Dabidën tsyuecquid icsho Dabidën mado caimbi –quepondash Padiseyobo.

43 Adsho tantiashumbien Esusën: – ¿Bëdamboenda chuidio? Mimbi chiapadquid aton mado icsho ¿atotsieshun Nuquin Papan Mayanën tantiamicpadomboen Dabidën con Icho capampic? Naden Dabidën dada uapampic.

44 “Nuquin Papan con Icho naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icho mibi camenu,’ quequin Nuquin Papan con Icho chiendac,”

quequin Dabidën dada uapampic. 45 Con mado cainquo icquin con Icho capampic Dabidën. ¿Atotsieshun mimbi: “Dabidën mado nec,” quequin tantiape? –caquien 46 ëcbedenquo yec otacquo tabadpondash. Esusën bëdamboen chuisho tantiash: –Icsamboen chienquien icchitec. Ëmbi padpiden: “Icsamboen chuimenu,” cac bëdamboembidi chuioatsiash –queshun abi chieshënquido abitedishun Esus padpiden chuimenquo icquin ënaccondash.

23

*Bëdambo icquid damianquido tanenda, quiaid
(Mad 12.38-39; Duc 11.43, 46; 20.46)*

¹ Adshumbic Esusën abëd icquidobëdta abi datsidadquido tantiamequin chuipondash.

² –Tantia. Moisesën dada uampid chuibanquidobëdtan tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³ Aden Moisesën dada uampid abimbo chiac adenuidi mimbi nac bëdambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niacniaquec. ⁴ Chieshëmënuquido nec. Nuquin Papan chiaid nametiadquidëmbi tsusedpabon ambembi chiaid dadpenquo namepec chushcanquin. “Matsesën aitedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquo iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec queshun matses ismenuenuidi naic. Adembidi aton dashcute tëdiadte nacnenuequin: “ ‘Nuquin Papa chianequidquo nec,’ ma ëbi canu,” queshun sedquid shoyonaid ënapenpactsëcnuc cuididicash matses ismenuec matses tabadacno capucuenepc. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho ichon abëdi tsadmequid,” quiash icbobëdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuc utsibobëd tabadenquo yec tsusiobobëduidi tabadquid nec. ⁷ “Chuiquidquo yec mibi bëdambo iquec,” camete bunquiec matses

dadpen tabadacno nidtenepec.

⁸ Mibitsen adenda. Utsibo: “Mibiuidtsëqui bëdambo iquec, Icbo,” camenuc adenda. Min Icbo abentsëcquiobi ëbi iquec. Ëbi abentsëqui con Icbo cata. Con yuabo yec con utsibo mibi neque. Bëdamboec isnanta. ⁹ Adembidi mibi chuibanquid chuiquimbi: “Mibiuidtsëqui bëdambo iquec, Papa,” cainda. Nuquin Papauidtsëqui aden chuita. ¹⁰ Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Ëbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquio utsi nibëdec.

¹¹ Padnuen ambi chiacpadomboen utsibo nashunquidquio utsibo dëniacte bunenquio icquid Nuquin Papan bëdamboshë catsiash. ¹² Utsien abibi cadequi: “Ëbiuidtsëqui bëdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bëdambo caindac — quepondash Esus abi datsidadaido chiec.

Abi chieshënquido Esusën chushcaid

(Mad 12.40; Duc 11.39-45, 52; 20.47)

¹³ Adshumbic abi chieshënidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” qeshobi mimbi bëdamboen chienquio iquec. Ëmbi Nuquin Papabëd tabadte bëdamboen

chuisho mimbi tantienquo iquec. Aden tantienquo icquin: “Aidën chiaid tantienda,” quequin mimbi utsibotsen Nuquin Papabëd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquo damenuen utsibo tantiamequinuidi buëdpambo cuëdquin Nuquin Papa chiacbimboen mimbi chianepec. Aid abimbo mimbi chienquo iquec. Adec chieshanquiecscho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquo yanash Satanasën yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bëdamboen tantiamenquien mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidën Nuquin Papan chiaid niacquid,” quetiadquidi mibi adenquo iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquo iccoc. Padenquo yec: “ ‘Nuquin Papa tabadte shubu uashunaid dapan icquid shocosh piu nacnenaidquo utsi uatiapimbo yacpaden abimbo chiombi,’ quequid muesa nec,” quechitequien mibi iquec. ¹⁷ Aden

tantienquo icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bèdapenquioda icpec? “Aid bèdambohè icnubi aid nuntan icquid bèdiactsèc bèdambo iquec,” caimbi. Mimbien icsamboen tantiec. ¹⁸ Nadentsen mimbi icsamboen chiec. “ ‘Nuquin Papa tabadte shubu uashunaid dapa yacnoshon: Mabi Nuquin Papan bèdamboen isnu, quequin nèish pichicate nacnenaaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquo iccoc. “ ‘Nuquin Papa mabi bèdamboen isnuequin pichicatequid nèish utsi uatiapimbo yacpaden abimbo caimbi,’ quequid muesa nec,” mibi quepec. ¹⁹ ¿Adenda mimbi bèdamboen chuipe? Pashuacbimboen mimbi bèdamboen tantienquo iquec. ¿Mitsicquid bèdambo iquec? “Mabi Nuquin Papan bèdamboen isnu,” quequin nèish pichicate nacnenaaid dapa bèdambo icnuc aidèn pichicatequidi nèishquo bèdapabi ictsec. Nuquin Papamboen bèdambohè iquec. ²⁰ Nèish pichicate nacnenaaid caic: “Aid utsi uatiapimbo yacpaden abimbo caimbi,” quequin aid nantequid nèish abitedi chiaidbidi nec. Adembidi ambi: “Mabi bèdamboen isnu,” caid Nuquin Papatsen chuipèc. ²¹ Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. ²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidèn chiaidquo tantiec: “Abimbo cacbimboen

chuiquid icsaquid nec,” quetiadquidi mibi adenquio iccoc.

²³ Bëdambo icquid damianquid yec Nuquin Papan cuidtequido mibi nec. Nuquin Papan chiaid abentsëqui tantiatsëcquin min tiedën canitsëcquid musuquëmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshëmianquid icboedi: “Ëbi bëdamboen ista,” qesho bëdamboen istiapimbo mibi iquec. Adembidi bëdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. ²⁴ Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nësamëdpanumbobi acacbimboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbëdta dëshote chieshquin cachocuidtsëqui dapanshun anauc ampanambo icquidi ampanaid damianacbimboec mibi bëdamboec tabadquid damianquiec. Nuquin Papan chiaid dadpen nainquio icquin

mitsanauidi bednuen mibi bunaiduidi mimbi napec. ²⁶ Pamumēdabimboec tantiatiapimbo mibi iquec. Dēshote abichobi bēdamboen ampanabimboec icsaid ucudash bēdambo icta. Adec icsainquo yec ēnēdash Nuquin Papan chiacpadec mibi bēdamboec tabadtsiac.

²⁷ Bēdamboec tabadquido mimbi damesho isun Nuquin Papan mibi cuidendac. Unēsaid chococacno bēdamboen nacnenac bēdambo isadec ēnden pisenambi. ²⁸ Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niacniacquin mimbi natemaidien mimbi nachitec.

Padiseyobo chedo cuidte chiaid

(Duc 11.47-51)

²⁹ Nuquin Papan cuidtequidombo mibi nec. Nuquin Papan oncamiāidobēdta bēdamboec tabadquido nuquin tsusedpabon unēs uampido tantiaquin aido chococampicno shubu uaquin mimbi nacnempec. ³⁰ Adoshombic: “Nēbo con tsusedpabon chieshēnquin unēs uampid chococac. Aidbēd tabadquin ěmbi unēs uainquo ictsenēdac. Ěmbien bēdamboen istsenēdac,” queshun mimbi aido chococacno nacnempec. ³¹ Adoboedēmbi nuquin tsusedpabon bēdambo icquid unēs uampicpadomboen adoante bunquin mimbisen chieshtoshon adoaindac. ³² Ai, nuquin tsusedpabon Nuquin Papan oncamiampid unēs uacpadombota –quepondash Esus abi unēs uate chiec.

³³ Adashic abi padiseyobo chiec: –Nisibimboec icsa uanquido mibi nec. Adquido icsho Nuquin Papan icsano nēsecaquin mibi cuidendac.

34 Icsaido icsho isun: “Ma Nuquin Papan bēdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunosshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. ³⁵ Adosho isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ēnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquio cuesunepampic. Aidedi unēs uampido tantiaquin aido unēs uaquido cuidacimboen Nuquin Papan mibitsen cuidquiendac. ³⁶ “Yuecshun min tsyuecquido cuidendac,” quec nenquio iquebi. Nēbi caimbi —capondash Ēsusēn abi chieshēnquido chuiquin.

*Edusaden yacnocquido Esusēn shubi uaid
(Duc 13.34-35)*

³⁷ Adshombic Esusēn chuioapondash. —Tantia, Edusaden yacnocquido. Mibitsen chuinu. Mibi tantiac unēsquio iquec. Mibi yacnobidi tabadquin Nuquin Papan oncamaidon chuisho nuquin tsusedpabon unēs uapampic. Adembidi Nuquin

Papan: “Isadaidbo chiec nid,” caido chosho utsi-utsien cuënoten seshunequiopampic. Adembidi mimbi nëbi naindac. Adquidombo icsho mibi tantiaquiemi. ¿Mitsipadec cachina aton bacuë cudaspec? “Penushe,” quiash aton bacuëmpi nua shoccoshon madadec cudasquid. Adecbidi: “Satanasën yuanushe,” quiash cudasquieci mibi Nuquin Papa bëdamboen ismete tantiametiadquo iccobi. “Tantiamentu,” cac tantiante bunenquo mibi icchitoc. ³⁸ Èbi nidambic èbi tantiatiapimbo icsho Nuquin Papan namiac min shububëdtabi mibi nibëdamendac. ³⁹ Nëbi mimbi èbi isenquo yanendac. Padnuen min matsesën yuecash chosho èbi isendac. Aden isash: “Nuquin Papa yacnuësh choquid bëdambo iquec,” min matses quendac –quequin Edusaden yacnocquido Esusën chuipondash.

24

*Nuquin Papa tabadte shubu uashunaid
nibëdante chiaid*

(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquënë uacno tabadanec nidequi Esusbëd icquido Nuquin Papa tabadte shubu uashunaid caic: –En is, Icho. Nëid shubu bëdamboen nacnenaidquo neque –quepondash. ² Adsho tantiashun Esusën: –Mimbi isboedquo cuënote bëdamboen nacnenaid matses utsibon cuënote chic-chiquendac nibëdquiecnuc –capondash.

Nuquin Papan cuidte ushë chiaid

(Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabadtuidshun aböd icquidon utsibo tantiamenquo icquin Esus chuipondash. –En mibi chote chui. Tantuanu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? –capondash aböd icquidon. ⁴ Adoaquien Esusën naden chuipondash: –Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. ⁵ Adquido choshon: “Nuquin Papan chomiaidquo Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquo cuesnan-cuesnanac caosh,” quecuededendac. Adsho tantiash dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac. ⁷ Adec matses utsi dadpen icquido matses utsiboböd cuesnanendac. Nidaid utsi-utsiec yacno pete nibëdquiec icted-ictedendac. Nidaid utsi-utsiec yacno nidaidquiobi comapenec uëdëquedenendac. ⁸ Adsho isash chido bacuë nëncuenacsho isun: “Nëbien tishchitec,” quequin tantiacbimboen tantiata. “Nuquin Papan abitedi cuidte nëbi nec,” quequin tantiata –quepondash Esus.

⁹ Adashic abi onquec: –Èmbi chiacpadquo icnuc chieshëmënuquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido

chieshënquindac. ¹⁰ Adoac ëbi tantiatsëcboedëmbi chieshtoshon ëbi tantienquoio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

¹¹ Padnuen muaquido: “Nuquin Papan chui-boedquoio chuinu. Tantia,” quependac dadpen. Adsho tantiashun dadpenshun: “Ai, abimboen mimbi chiec,” caindac. ¹² Matses dadpenquoio icsamboecshë tabadsho isun ëbi tantiatsëcboedëmbi ëbi tantienquoio yanendac. ¹³ Padnuëmbi ëbi choabi icshobi ënenquoio icquin ëbi tantiaquido Nuquin Papa yacno tabadmendac.

¹⁴ Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi — quepondash Esus.

*Matses icsamboshë icquid chote chiaid
(Mad 13.14-20; Duc 21.20-24; 17.22-24)*

¹⁵ Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Èndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquoio nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,”

quesho tantiash Udeya yacnoçquido macuësh dapa yacno ompodec cuenac bēdambo ictsiash.

¹⁷ Adec cuenec shubu dayun icquido puduedenquio yec: “Con na bednu,” quenquio yec umanucuēshi cuenac bēdambo ictsiash.

¹⁸ Adechidi badedquio cuenuen tied nantan icquidon aton dashcute utsi aton shubuno beduanenquio yac bēdambo ictsiash. ¹⁹ Nidequi bacuē usunquid yec bacuē chishmequid yec quec badedquio cuentiapimbo yec mēyadquindac.

²⁰ Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushēnquio cuemenquio icpashuni,” queoata.

²¹ Aden Nuquin Papa tabadte shubu uashunaid dapa icsa uate bunquid icsamboshē icquid choan matses dadpenquio natiambo chieshēmēnquiec tabadendac. Nuquin Papan tauamboen matses uac adec tabadenquio ictenec.

Nēbi adec tabadenquio iquec. Aido icsamboecshē tabadquido nibēdanambic utsibo adquidpenquio yanoaindac.

²² Adec icsamboecshē tabadte tantiaquin Nuquin Papan: “Ēmbi Esus tantiaquid icmiaido uesquin cuesun sianushe. Matses abitedi nibēdanushe,” queshun yuenquio icsamboen tabadmenquio icquin ēnēdmendac —quepondash Esus.

²³ Nuquin Papan aden ēnēdmiabi yac icsamboecshē tabadec utsibo: “Is. Nēid Nuquin Papan chomiaidquio Quidistu neque,” quependac.

Ūtsibic: “Is. Nēidquien Nuquin Papan chomiaidquio Quidistu caid neque,” quequin icsam-

boen chuioaindac. Adsho tantiashun: “Nuquin Icho Esus choashien nec,” cainda.

²⁴ Adec muaquidoba choendac. “Nuquin Papan chomiaidquo nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiad nebique. Is,” quequin nadatiambo icquin nabanquin ismendac. Adsho isun dadpeshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiaido yec adtiapimbo iquendac. ²⁵ “ ‘Chieshëmënquido iquendac,’ quequin tantienquo icquidën ëbi tantienquo yanushe,” qeshun: “Aden ëbi tantiaquido chieshënquiendac,” quequin chiombi –quepondash Esus.

²⁶ Adashic padpidec onquec: –Ëmbi aden çuiboed tantiashun utsibo muasho tantienda. Ëbi caic: “Utsibo ismenquo yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque. ²⁷ Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquo isenquo icpadic? Ai, isec. Adembidi ëbi choasho matses abitedishunquo isendac. ²⁸ Adec choendabi. ¿Ada edeste pisen chec budenquo icpadic? Ai, budec. Adecbidi Nuquin Papan cuidte ushë chonoc choendabi –quepondash Esus.

*Abi chote Esusën chiaid
(Mad 13.24-37; Duc 21.25-33)*

²⁹ Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushëtsen chënquenquo yanendac. Uispa chedo paëdbudnendac. Uispabimboecquid abitedimbo uëdëquendac. ³⁰ Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid. ³³ Adembidi ëmbi chuiboed isun: “Nëbimbobi Esus choec,” quequin tantiata. ³⁴ ¿Muectabi nedi? Ëmbi chuibocpadquo iquendac. Ëmbi chiacpadec yanabi matses abitedi nibëdantiapimbo iquendac. ³⁵ Abimbo caimbi. Abu nibëdanendac. Nidaidsen nibëdanendac. Padnuen ëmbi chuiboedquo nibëdantiapimbo iquendac. Bënudenquo iquendac. Ucuttiapimbo iquendac. Ëmbi chuibocpadquo iquendac —quepondash Esus abëd icquido chiec.

*Esus chote ushë tantienquo icte chiaid
(Mad 13.32-33; Duc 17.26-35)*

³⁶ Adashic abi onquec Esus: —Ëbi chote tantienquo iquembi. “Aid ushënquo choendabi,”

quetiapimbo iquebi. Adembidi mayan bēdabon tantienquo iquec. Ĕmbibi Nuquin Papan Madonquiobi tantienquo iquemi. Nuquin Papanuidtsēquien tantiec. ³⁷ Matses ēbi caic: “Nēbi choec,” quetiapimbo icnuc choendabi. Noen cano nacnenubī ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. ³⁹ Aton matses: “Nēbimbobini Nuquin Papan cuidchitec,” quenquo icnubi ue dapambo choec mauanquidēn matses abitedimbo unēsbudnepampic Noe ambi cano anshubu uaidēn nuadtonobi. Adecbidi Nuquin Papan cuidtequido ēbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ĕmbi: “Bedtan,” cac tied nantan dada daēd icsho istuidshun ēbi tantiaquid abentsēc icsho beduanendac. Utsibic ēbi tantiesa icsho nianendac. ⁴¹ Adembidi Nuquin Papa yacno tabadmenuen chido daēdshun macueso istuidshun abentsēc ēbi tantiaquid icsho aid abentsēc beduanendac. Chido utsibic ēbi tantiesa icsho nianendac.

⁴² Aden Ĕmbi chuiboed tantiashun: “¿Nēbida con Icho chopeba?” quequin ĕnenquo icquin tantiata. Ĕbi chote mimbi tantienquo iquec. ⁴³ ¿“Nēbi ampequidēn ampec,” quequinda tantiapadic? Padenquo. Tantaquidēnquien aid

ushënquoio aton na bēdamboen isquin ampemenquoio ictsiash. Aden tantienquoio icquin: “Ampesho isnu,” quequin ēnenquoio icquin isquid. ⁴⁴ Adembidi ēbi chote ushē mimbi tantienquoio ye. ¿“Nēbida nuquin Icho chopeba?” quec Nuquin Papabēd tabadte bunec bēdamboec tabadta. Matses dadpen: “Nēbien chochitec,” quenquoio icnubini choendac –quepondash Esus abēd icquido chiec.

Esus bēdamboen cainte chiaid
(Duc 12.41-48)

⁴⁵ Adshumbic abi bēdamboen cainte Esusēn chuipondash. –Tantia. Aton icbo tantiaquin yua bēdambo icquidēn naid mibi chuīnu. Icbon: “Ēbi nidan mibēdta yuaido pete sandoaid musucshun ēmbi chiacpadēn ēmbi chiacpadēnquien menianeta,” cac yua bēdambo icquidēn adotsiash. ⁴⁶ Adnubien icbon choshon ambi chiacpadomboen yuan nasho isun bēdamboen istsiash. ⁴⁷ Adshumbic aton yua chuitsiash. “Bēdamboen tantiaquid mibi neque. Con yua utsibo namequin con natedi dayun uata,” catsiash icbon yua bēdambo icquid caquin. ⁴⁸ Padnuen yua icsambo icquid: “Ēndenquimbo con icbo nidondash. Choenuien icchitec. Con nauidi nanu,” ⁴⁹ quiampatsiash. Adshumbic chieshtoshon abēdta yuaido cuesanetsiash. Adashic icsambo icquidobēdi icsamboec tabadtsiash. ⁵⁰ Adec: “¿Nēbida con icbo chopeba?” quenquoio icnubien aton icbo chotsiash. ⁵¹ Choshon ambi chiacpadomboen nainquoio icsho istuidshumbic: “Icsambo iquec,” qeshun comapenen cuesquin cuesunetsiash.

Adembidi Nuquin Papan icsambo icquido cuidendac. Bëdambo icquid damianquido cuidacno icsamboshë yacno nidmendac. Adoac natiaic shubiquiendac –quequin abi bëdamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoacbimboen chuiquin abi chote ushë tantienquio icte chuipondash. — Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aidbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-icboen buanuen sanambededpac caondash.

² Aid chido 5tedi tantienquio icquido icnubi 5tedbidi bëdamboen tantiaquido icpac caondash.

³ Tantienquio icquidon: “Tabote bëchi naimëdsho cushtonon buanu,” quenquio icquin bëchi uesadbudtsaid taboteuidtsëqui sananquin caimpac caondash.

⁴ Padnuen bëdamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash.

⁵ Aden cainaqui: “Chido bedtanu,” quianec nidboed choenquio icsho isash abitedi ushcastoash ushcuededpac caondash.

⁶ Inchësh poctsemboen: “Choeque. Bëquednu.

Nid,” cac ⁷ isucunshun chidobon taboen tabote dēbedpac caondash. Adoshon bēdamboen tantiaquidon ambi bēboed bēchi cushtonobien ⁸ icsamboen tantiaquidon: “Bēchi beccho. Con na naimēdeque,” caquien bēchi bēboedēn ⁹ bēdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchēshtsiac. Piucquid menequin bēchi cushtoquid baded cushtometan,” capac caondash. ¹⁰ Adoac bēchi bedec nidnubien chido bedtanec dada chopac caondash. Chosho bēdamboen tantiaquidon aton tabote taboshon chido bedtanec choquid bēquedstampac caondash. Adtanec abēdi choash puduedshun bētashte puduedtiapimbo icnuc bēdamboen bētashpac caondash. ¹¹ Adnubien bēdamboen tantienquio icquido bēchi bedtanec chopac caondash. Choshon shēcuē bētashacsho isun: “Shēcuē shēcne, buchi. Ēbitsen puduednu,” ¹² caquien chido bedquid: “Padi. Ēmbi tantiacmaido mibi nec,” quepac caondash.

¹³ Ēmbi chuiboed tantiaashun chido icsamboen tantiaquido tanenda. Bēdamboen nabi icsho: “Ēmbi tantiacmaid mibi neque. Puduedenda,” aido cacbimboen ěmbitsen Nuquin Papa yacno puduedmenquio icquin cacumechitomane. Ēbi chote ushē tantiadenquio icnuc: “¿NĒbida con Icho chopeba?” quequin ěbi bēdamboen tantiec ěmbi chiacpadec bēdamboec tabadta —quepondash Esus abēd icquido chiec.

*Icbon piucquid daēd uaid chiaid
(Duc 19.11-27)*

14 Adshumbic abi tantiaquidon ambi chiacpadomboen nate Esusën ompoacbimboen chuioapondash. Ënapen nidnun aton piucquid dadpen dayun uaquidën aton yuabo: “Ëbi piucquid daëd uashunta,” quequin chuipac caondash. 15 “Nëidën bëdamboen tantiaquidquo icquin con piucquid ëbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid ëbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi ëbi con piucquid daëd uashuntsëctsiash,” qeshun utsitsen piucquid abentsëcquiobi menetsac caondash. Adanec nidpac caondash icbo. 16 Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. 17 Adembidi piucquid 2ted meneboedën 2bidi daëd uapac caondash 4tedi icnuc. 18 Padnuen abentsëc meneboedën chieshquin aid daëd uainquio icquin ambi uëdëshcaboed shëcuë anantsëcquin piucquid abentsëqui ompopac caondash.

19 Yuecquio ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac 20 sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien 21 icbon: “Ai, con na daëdpactsëc icboedi daëd uaquin mimbi bëdamboen nac. Nëbi ëbëdtan chuiq-

uid dapa icta. Ēbēd cuishonquec tabadec cho,”
 capac caondash. ²² Adnubien piucquid 2tedi me-
 niondaidēn: “Is, icbo. Mimbi meniondaid 2ted
 icboedi daēd uaondambique. Nēbi mitsana 4tedi
 iquec,” caquien ²³ icbon: “Ai, ěmbi chiacpadom-
 boen mimbi con na daēd uac. Nēbi ěbēdtan chuiq-
 uid icta. Mibitsen ěbēd cuishonquec tabadec cho,”
 capac caondash.

²⁴ Adnubien piucquid abentsēcquiobi
 meniondaidēn chieshquidēntsen: “Mimbi
 ancaidon nidtsinaid peteuidi bedquid mibi
 nec, icbo. Mimbi chiacpadomboen nainquio
 icsho isash chushcanquidquio mibi nec.
²⁵ Adec dacuēdampambo icquid icsho mibi
 dacuēdēnquin mimbi meniondaid piucquid
 ompoquin chococaondambi. Nē mimbi
 meniondaiduidtsēqui ictsec,” caquien ²⁶ icbon:
 “Chieshquiec mibi icsac. Ěmbi chiacpadomboen
 nambo mimbi iquec. Ěbi caic: ‘Ancanquid icquin
 ěbi chushcanushe,’ queshun ²⁷ nuquin matsesēn
 nacpadomboen utsibo meneshun piucquid
 daēd uaquin mimbi bedtsempac. Adoacsho
 aid daēd uaquin bedtsenombi. Chieshquin
 mimbi icsamboen nac,” ²⁸ quepac caondash.
 Adshun aton yua utsi caic: “Chieshquidēn na
 bedshunshun piucquid 10ted dayun uatsēboed
 mene,” cac meniac 10ted icboedi 11ted yanac
 caondash. Adshumbic chieshquid comapenen
 cuidpac caondash. ²⁹ Adembidi naindami.
 Ěbi tantiaquin ěmbi chiacpadomboen naquid
 adembidi namequin bēdamboen tantiamendambi.
 Ěbi tantiesabo ěmbi chiaid niacquid bēdamboen

tantiamenquio iquendambi. ³⁰ Aid yua icsambo icquid cuidachimboen Nuquin Papan ëbi tantiesabo cuidquiendac. Ambi icsaido cuidquiacno nēsecac natiaic shubiquiendac — quepondash Esus abëd icquido chiec.

Matses nashunesa cuidte chiaid

³¹ Adshumbic Esusën padpiden chuipondash. —Nuquin Papan abi yacnoshon uaido mayan bēdabobēd choec: “Abitedishun Icbomboeni nec,” quiash bēchamauampamboec dacuēdampamboec choequi chuiquid dapan tsadten tsadtoquin abitedi ismendambi.

³² Adshumbic matses abitedimbo cho-chomequin tsidadmendambi. Adshumbic ichon aton nauidquio tsinacacimboen ëbi tantiaquido naden chiendambi. ³³ “Ēbēd tabadtequido

mibi neque. Nēmbo con abiuc tabadec cho,” caindambi. Adshumbic ëbi tantiesabo chuiquin: “Ēbi tantiesabo ciudadtequido mibi neque. Con copioc tabadec cho,” caindambi. ³⁴ Adshumbic ëbi tantiaquido padpiden chuioaindambi.

“Ēbēdi tabadec cho. Matses uaquin tauabi ëndenquimboshē mibi caic: ‘Aido ëbi tantiaquido icmeshun ëbēdi tabadmendambi,’ quequin Nuquin Papan tantiaidombo yec ëbēdi bēdamboec tabadec cho. ³⁵ Mimbi ëbi nashundenec. Bundoacsho mimbi ëbi pemedenedec. Acte

bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec.

³⁶ Con dashcute nibēdsho mimbi ëbi dashcute menenedec. Daicsabudtsash unēstiadtsēcquio icsho ëbi tantiec mibi datsadtenec. Quēnēn nauedacsho mimbi ëbi isuan-isuandenedec.”

caindambi. ³⁷ Adoaquien bēdamboec tabadquido: “Tantiadenquo icnuc mimbi chuipec, icho. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ēmbi isacmaidquo icshodambi mibi yuedtionda? Mambi padambo yoc. ¿Dashcute nibēdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quēnēn nauedacsho mibi istaniambo iquemi. Mimbi tantiadenquo icnuc chuipec,” ēbi caindac. ⁴⁰ Adoaç naden chiendambi. “Tantia. Mibi chuinu. Ēmbi chiacpadomboen ēbi tantiaquido utsibo bēdamboen isquin mimbi nashundenec. Aden ēbibi nashunacimboen mimbi utsibo nashundeneque. Ēbēdi tabadec cho,” caindambi.

⁴¹ Adoshombic ēbi tantiesabotsen chiendambi. “Nuquin Papan cuidtequido mibi neque. Mibi icsaid ēnte bunenquo icquid mibi neque. Nuquin Papan Satanas aton yuabo podobitsi icsabobēdta ēnenquo icquin cuidacno nid. ⁴² Ēmbi chiacpadomboen ēbi tantiaquido nashunesambo mibi icteneque. Bundoacsho mimbi ēbi pemenquo ictenec. Acte bundoacsho mimbi ēbi acmenquo ictenec. ⁴³ Mimbi isacmaid icsho mimbi ēbi cacumedenec. Dashcute nibēdsho mimbi ēbi menenquo ictenec. Daicsacsho isash mibi ēbi datsadenquo ictenec. Quēnēn nauedacsho mimbi ēbi istanenquo ictenec,” caindambi. ⁴⁴ Aden chiaquien: “Tantiadenquo icnuc mimbi chiec. ‘Pete bundopash,’ quequin tantienquo iccondambi. ‘Acte bundopash,’ quequin tantienquo iccondambi. Ēmbi isacmaid

icscho mambi mibi isambo yoc. ¿Min dashcute nibédshodambi mibi istionda? Mambi padambo yoc. Mambi mibi daicsacsho isambo yoc. Mibi quènèn nauedaid tantiambo iccondambi. Tantiadenquo icnuc mimbi chuipec,” caindabi ëmbi chiacpadomboen naisabon. ⁴⁵ Adoac naden chiendambi. “Ëbi tantiaquido nashunenquo icquin ëbibi nashunenquo yacimboen ëmbi chiacpadomboen naisabo mibi neque. Nuquin Papan cuidacno nid,” caindambi. ⁴⁶ Adoac icsamboec tabadquido ënenquo icquin cuidacnombo nidnubi bédamboec tabadquido Nuquin Papa yacno ënëdenquo yec tabadendac –quequin Esusën chuipondash.

26

*Esus bedshun unës uanuequin chiaid
(Mad 14.1-2; Duc 22.1-2; Uan 11.45-53)*

¹ Aden abi chote ënquin chuitanquimbic abi unës uatetsen abéd icquido Esusën chuipondash.

² –Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquo icnu,” queshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac –quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. ⁴ Adashic: –Nëbien Esus unës uametiad utsibo ismenquo icquin bedshun. ⁵ Nuquin matses obeca pec tabadnuc bedenquien ictiad. “Esus bédambo icquidi cuesunec,” queshun

obeça penuec cho-choquidon nuqui cuesnushe
—quepac caondash.

Chidon Esus machiuinaid
(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bédamiondaid Simon caidèn shubun puduedpondash. ⁷ Puduedshun pec samédshobien chidon puduedshun ambi piucquid dadpenquoio menequin bedaid tēchumpin icquid bédambo nuadquid Esus machiuimpondash: —Esus bédamboshē icquid nec —queshun. ⁸ Adsho isumbien Esusbéd icquidon: —¿Adenda bédamboen nai? Ma icsambo yoc. ⁹ Utsibo menequin dadpen piucquid bedshun piucquid nibédquido aid piucquid menetiadquidi mibi nec —quequin chido chushcapondash.

¹⁰ Adsho tantiashumbien Esusèn: —¿Atotsieshun chido chushcai? Èbi bédamboen tantiaquin èbi ismequin bédamboen nashunebique. Chushcainda. ¹¹ Mimbi chuiboed piucquid nibédquido ènēdenquoio yec mibēdi tabadendac. Èbien mibēdi tabadenquoio yanendac. ¹² Èbi unēs uashun chococate tantiacimboen machiuinoshibique. Chushcainda. ¹³ Èmbi chiaid chuibeniacnoshon nēid chidon èbi machiuimboed chiendac —quepondash Esus abéd icquido chiec.

Udasèn Esus bedmenun piucquid bedaid
(*Mad 14.10-11; Duc 22.3-6*)

¹⁴ Adnubien Udas Iscadiote caid Esusbéd icboedi Esus chieshēnquido chuiquid dapabo chiec nidpac caondash. ¹⁵ Nidshumbic

chuituidpac caondash. —Utsibo ismenquoio icquin mibiuidtsëqui Esus bedmenu. ¿Tedtsi piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. ¹⁶ Meniac bedanec nidec: —¿Mitsishunquiemi utsibo ismenquoio icquin Esus bedmepeba? —quepanëdash Udas. Adashic Esusbëdi tabadoaic chopondash.

*Unësnush abëd icquidobëd Esus pec tabadaid
(1Cod 11.23-26)*

¹⁷ Adnubien Esusbëd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquoio icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: ¹⁸ —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

20 Inchëshëmbi abëd icquido 12tedbëd samëdquin Esusën pepondash. 21 Pec samëdquin Esusën chuipondash. —Tantia. Mibi chuinu. Ëbi chieshënquido ëbi bedmequid abentsëc nëmbobi iquec —quesho tantiashun 22 unësquio yanshun abentsëcshun abentsëcshunquien Esus chuipondash abëd icquidon. —¿Ëbida cai, Icho? —quequin abi chuishobien 23 Esusën: —Ëbëdtan pete codocaid ënë punquid ëbi bedmequid nendac. 24 Ëbi Nuquin Papan chiaid dada uamepampicpadquid matsesmiaid yec unësendabi. Padnuen ëbi bedmequid comapenen cuidtequidquio nec. Anin aid tishenquio icpatecnëdan. Cuidac natiaquiendac —quepondash Udas caic.

25 Adoaquien Udasën abi bedmequidënquio: —¿Ëbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

26 Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi.

27 Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsä-pictsen acbampondambi. 28 Aid actequid acshobien Esusën: —Nuquin Papan chiaid nuquin tsusedpan

dada uapampicpadec ëbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquio iquec,” quequin nëid acquin tantiata –capondashi.

²⁹ Adashic: –Nadquid actequid padpiden aquec cuishonquec mibëd tabadenquio iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi – quepondash Esus ëbi chedo chiec. ³⁰ Adashic cuëdënten abentsec cuëdënnash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid
(Mad 14.26-31; Duc 22.31-34; Uan 13.36-38)*

³¹ Macuësh dapa Odibos caid yacno nidquimbi Esusën chuipondashi. –Nëid inchëshëmbi Nuquin Papan chiacpadec ëbi nianec mibitedi niqendac. Nuquin Papan naden chuipampic. “ ‘Icho cuesnu,’ canubi aton yuabo niqendac,” quequin Nuquin Papan dada uamepampicpadec mibitedi adec niqendac. ³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi –quepondash Esus abëd icquido chiec.

³³ Adoaquien Petedo: –Mibi cuesnuec chochoso isash utsibo dacuëdec niqenuc ëbimboen cuenenguimbo ictsandac –queshobien ³⁴ Esusën: –Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquio aidi nec,” mimbi ëbi caindac. Cachina bënë cuëdanabi icnuc 3tedec mibi adendac –caquien ³⁵ Petedo: – Pada. Adtiapimboeni iquec. Chieshëmënquidon:

“Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibëdquiobi unëstsiandabi — Petedo quenubini: —Ai, ëbivic adecbidi ictsiac — quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

³⁷ Adashic Petedobëdta Sebedeyon mado daëd buanec nidpondash. Udictsëc nidequi unësqquo yanec shubiantiadtsëcquo yampac caondash.

³⁸ Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiash unësqquo iquebi. Ëbi yacpadec ushenquo yec nëmbobi isec tabadta —quianec ³⁹ udictsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquo icpatsia, Papa? Mimbi: “Ai, mibi unës uamenquo iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquo yec isequi tabadta —caboqui. —¿Yuec-yuecpactsec ushenquo icquin istiapimboda icco? ⁴¹ “Satanasën icsamenushe,” qeshun ushenquo icquin Nuquin Papa chuita. “Ushenquo iquebi,” queboedobi ushcas

mēmunenquo yec mibi ushpec –capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: –Ëbi unës uametiadquo icquin ëbi unës uameta, Papa. Ëbi unës uametiapimbo icquin mimbi ëbi unës uamenquo icsiac. Mimbi tantiacpadomboen nata, Papa –quetanec ⁴³ choaquin isquien Petedo chedo ushoaïc ushcas mēmuntiapimbo yec.

⁴⁴ Adsho istanec nidoashun ambi chui-bocpadomboembidi Esusën Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: –¿Ushecta ue? Nëbimbobi ëbi unës uamenuen ëbëd ichoedëmbi icsambo icquido ëbi bedmeque. ⁴⁶ Nidnu nid. Is. Ëbi bedmenuec ëbi bedmequid choeque –quepondash Esus Udas chosho isash.

Abi chieshënquidon Esus bedaid

(Mad 14.43-50; Duc 22.47-53; Uan 18.2-11)

⁴⁷ Adnubien Udasën Esusbëd ichoedën bedtanac matses dadpen cuesantiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdtan con matses tsusiobon: –Bedtan –cac cho-chopondash. ⁴⁸ Ambi bedtanaidobëd cho-choquimbien Udasën: –“Nëid Esus nec,” quequin adoendambi –abi quiacpadembi ⁴⁹ Esus tansudcatuidpondash: –Chobi, Icho –quequin. ⁵⁰ Adoaquien Esusën: –Ëmbi tantiaboedquo mibi nec. Ëmbi adoboedënquiobi mimbi tantiacpadomboen

nata –qeshobien cho-choquidon Esus bedtuidpondash. Aden bedshun: –Cuidmenun chuiquid dapa yacno mibi buanu –capondash.

⁵¹ Aden Esus bedshobien abëd icquidën abi tsiusudaïd chështe chictanquin chuiquid dapan yua pateshunepondash. ⁵² Adoshobien Esusën: –Padi. Chën. Min chështe tsiusudoata. Cuesanquid icsho adembidi cuidnushe. ⁵³ ¿Tantienquioda ique? Èmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash. ⁵⁴ Nuquin Papan aden ëbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? –capondash pateshunianquid chuiquin.

⁵⁵ Adashic abi bedquido chiec: –¿Atotsi quenuec chështebëdta cueste sanambededtsëcquiec ëbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënquien Nuquin Papa tabadte shubu uashunaïd daquënë uaidën puduedshun chuideneshobi ma mimbi ëbi bēdenquio icboc. ⁵⁶ Padenquio icboedombi Nuquin Papan tantiacpadënquiobi mimbi ëbi bedec. Èbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec –quequin Esusën chuinubini niquepondac: –Cuenenquio ictsiabi –queboedi.

Caipas caïd yacno Esus buanaïd

(Mad 14.53-65; Duc 22.54-55, 63-71; Uan 18.12-14, 19-24)

⁵⁷ Adnubien chuiquid dapambo Caipas cuëmédquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. ⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: — Esus unës uamenuen: “Esus icsasho isombi,” quequin muaquidon chuisho tantianuna —queshun chomiac muaquido dadpenshun: —Esusën icsamboen nasho isombi —quequin chuipac caondash. ⁶⁰ Aden Esusën naid muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien ⁶³ Esusën ëcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” quesahun abimbo cata. ¿Nuquin Papan chomiaidquio aton Madombobida mibi nepe? —caquien ⁶⁴ Esusën: —Ai, mimbi chiaidquio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yac-

nuësh choshobini mimbi isendac –quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. –¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶ ¿Atotsi natiadquio ique? –caquien abëdtan chuiquid utsibo: –Adquid cuidquid quedeneque. Unës uamequimbien ictiad –quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcuestanquin: –“Nuquin Papan madombobien nec,” canu. En chui. Tantianu. ¿Tсандан мибі наоше? –cabededtsëcquien mamënshumpac caondash Esus.

Esus caic: Ëmbi isacmaid nec, quequin Petedon chiaid

(Mad 14.66-72; Duc 22.56-62; Uan 18.15-18, 25-27)

⁶⁹ Adnubien Petedo tabadacno choshon chido yuan chuituidpac caondash. –Cadidia yacnocquid Esus caidbëd ma mibi icpaboc –caquien: ⁷⁰ –Tantiadenquio icnuc mimbi chiec. Ëmbi isacmaidquio mimbi chiec –quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷²Petedo: —Ma ëmbi isacmaidquio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiabimboec ma mibi onquepayoc —quesho tantiash ⁷⁴Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquio neyoc —queoapac caondash.

Adec 3tedec Petedo muanubien cachina bënë cuëdampac caondash. ⁷⁵ Adsho tantiashun Petedon Esusën chuiboedquio tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquio tantiactanec umanuc puduenanec nidec Esus muauabosh nati-aic shubinidpac caondash.

27

Pidato caid yacno

Esus buanaid

(Mad 15.1; Duc 23.1-2; Uan 18.28-32)

¹ Adnubien chuiquid dapabo aton tsusio utsibobëdi Esus isec ushenquio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —queshun ² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas tētaniadaid

³ Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ēmbi bedboed piucquid shocoshēmpi 30ted meneoatanu —quianec abi meneboed tsusiobo menenuc nidpac caondash. ⁴ Nidshun tsusiobo chuituidpac caondash. —Icsachitobi. Unēs uanuequido bēdambo icquidi bedmechitombi. Nēid mimbi meneboed mibi menenuc chobi. Nē bed —caquien tsusiobo: —Padi. ¿Atot-sieshun nai? Ma mimbi bedmepaboc —quepac caondash Udas caic. ⁵ Adoaquien Nuquin Papa tabadte shubu uashunaid shēcuēn ambi bedboed shocoshēmpi piucquid ansecanec nidash uano cuenash tētaniadpac caondash Udas.

⁶ Aden piucquid shocoshēmpi ansecacsho bedashien tsusio dapabo: —Nuqui dayun uaid shocosh utsibēdta dayun uatiapimbo iquec. Unēs uanuen meniaid shocoshēmpi dayun uatemaïd quedeneque. ⁷ Matsu nacnenquidēn tied bedquin nēid menenuna. Nuquin matsespenquo isedquido unēsacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nēbi aid tied cuēnquin nadopec. —Unēs uamequidēn bedaid tied nec —capec. ⁹ Aden Udasēn shocoshēmpi 30ted menete nuquin tsusedpa Edemias caidēn dada uapampicpaden napac caondash. Naden dada uapampic. “ ‘Aid bednuen Isadaïdbon piucquid shocoshēmpi 30ted meneuidaïd bedoashun ¹⁰ matsu nacnenquidēn tied bedquin meneoapondash,’ quequin Nuquin Papan chiaïd dada uaombi,” quepampic Edemias.

Pidato caidën Esus chuimaid
(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bëacsho chuipac caondash. — ¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquio icpac caondash.

¹³ Adshobien Pidaton Esus padpiden chuioaquin: —Mibi icsaid dadpen chuipac. ¿Tantienquioda ique? ¿Ëcbedantiapimboda ique? —caquien ¹⁴ ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

Esus unës ua, quequin chiaid
(*Mad 15.6-15; Duc 23.13-25; Uan 18.38-19.16*)

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenec. Pidaton: — ¿Tsutsi abentsëquimbi cuemepe? —cac isadaidbon chiacpadquid abentsëc cuemedenec. ¹⁶ Esus bëabi icnuc uimanëmënquidquio Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui

padenquio yanuc nuqui dēniaquec Esus chuiquid dapa yanushe,” qeshun Esus bēaccosh. Nēmbo tabadquidon: “Esusquio cueme,” capashuni — quequin tantiaquin aden chuipanēdash Pidaton.

¹⁹ Adashic matses icsaido cuidte chuinuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aid dada bēdambo icquid neque. Unēs uamenda. Dacuēdampambo icsho ushquin isombique. Unēs uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshēnquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unēs ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash.

²² Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unēs ua. Cuesten dectanquin unēs ua — quecuededpondash.

²³ Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buēdanquiec cuēdec: —Cuesten dectanquin unēs ua —quecuededpondash.

²⁴ Adsho —Padi icnuna —caqui niacbidanquiec adequi unēs uate bunquiec cuesantiadpambo yansho isash: —Acte beccho —quepondash Pidato. Bēacsho tasun dapan cushtotanec mēpamēdquin

abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Ĕmbien adotiapimbo iquec. Mëpamëdec bëchish ucud-acbimboec mimbi icsamiaid ucudebi —quiasht mëpamëdquin ismepondash Pidaton. ²⁵ Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

Esus mamëshunaid
(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Chochoshon Esus mamëshumbededpac caondash unës uanumbi. ²⁸ Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin ²⁹ mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacbimboen sananuc abiucshun cuate sanamepac caondash. Adshumbic aton matses chuiquid dapa ismiacbimboen mamëshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash. ³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac

caondash. ³¹ Aden mamënshuntanquin ambi dasiuimboed chictanquin aton dashcutebidi dasiuinoapac caondash. Adoshon: —Ma unësnequin cuesten dectanec nidnu. Nid — quequin Esus buampac caondash.

Esus cuesten dectanaid
(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cueste yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash.

³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid acte-quid paëmbo dauë nēcushaid Esus meneuidpon-dash. —Në. Ac —cac pictsēc tantanec: —Padi — quepondash aquenquio yec. ³⁵ Adshobien cueste napotiaid bëboedën dectampondash. Dectan-shumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempi puduemiaid isbanquin Esusën dashcute bedbampondash. ³⁶ Adash: —Esus unëso isnu — quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cueste cuëshën naden dada uapaccondash. — Nëidquio Esus nec. Isadaidbo chuiquid dapambo nec —quequin dada uaid Esusën mapino dec-tampondash. ³⁸ Ampequid daëd cuesten ëquë dectambudcuenquin dectantanquin nēnantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash. ⁴⁰ — “Nuquin Papa tabadte shubu uashunaid chicchictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud — cabidanepondash. ⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënshunec nadpondash. ⁴² — Utsibo ismenuembien comapenen tantiaquin matses bédamechitosh. Adem-bidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu — quepondash tsusiobo. ⁴⁴ Adnubien abëdta cuesten dectamboedon ampequidontsen Esus mamënshumpondash.

Esus unësaid

(Mad 15.33-41; Duc 23.44-49; Uan 19.28-30)

⁴⁵ Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. ⁴⁶ Ushëmbo yanubien Esus comapenec cuëdec nadpondash. — Eloi, Eloi, lama sabactani — quec con onqueten cuëdpondash. — ¿Atotsieshun ëbi bédamboen isenquio yano, Papa Edoen? — quec adondash.

⁴⁷ Adec cuëdsho tantiash isquido nadpondash. —Edias yampid cuënchitequien nec — quiampondash. ⁴⁸ Adnubien Esus isec tabadquid abentsëc titinguianec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cueste dëdectanshun abuc sananec: —Chishmenu —queuidpondash. ⁴⁹ Adnubien abi isquido: — Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquiec cuëdtanec Esus unëspondash. ⁵¹ Esus unësnuubi Nuquin Papa tabadte shubu uashunaid yacnuësh: — “Quënë uquëduccquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. ⁵² Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. ⁵³ Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uëdëquenuc dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: — Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusböd choquin abi codocashumboedo Esus unëso isnuec ancuenhun isec tabadpac caondash. ⁵⁶ Nēidted icpac caondash. Nēidic Madia Mactada yacnuësh choquid. Nēidic Madia utsi Acobon tita. Aid Ose cuëmēdquidēn titabidi niosh. Nēidic Sebedeyon chido Uanēn tita. Aid Acobo cuëmēdquidēn titabidi niosh. Aidtedi uanoshon isbededec tabadpac caondash.

Esus chococaid

(Mad 15.42-47; Duc 23.50-56; Uan 19.38-42)

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuitu-idpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibēdquidēnquio nuamboshë icnuc datanedonepac caondash. ⁶⁰ Adotanquimbic nidaid cuēnoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuēnote dapabidi bëtashte uaid bincumbëshun bëtimpac caondash. Adotanec nidpac caondash Ose. ⁶¹ Adnubien Madia utsiböd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuë unës uacpadēn Esus unës uamiash abentsec ushashi chonoadtemaid ushëmbi Esus chieshënquido Pidato caid chiec

nidpac caondash. Padiseyobobëdi nidshun chuiquid dapabon Pidato chuituidpac caondash. ⁶³ –Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaïd cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita –capac caondash Esus chieshënkuidon. ⁶⁵ Adoaquien Pidaton: –Ai, con sondado buantan. Aden buanshun: “Unësaid nauedaïd cudasec databëdta,” cata –capac caondash. ⁶⁶ Adoaquien isadaïdbo tsusiobon sondado buanshun cuënote dapa bëtashaid bucun bëbitaccapac caondash. – Bëbitaccaid isash: “Chuiquid dapan bëbitaccamiïd nec. Cuidnushe. Esus chictiapimbo iquebi,” ma quenu –queshun bucun bëbitaccapac caondash. Adoshon: –Beduanushe. Isquiec tabadta –capac caondash sondado chedo chuiquin.

28

Esus uincuenaid

(Mad 16.1-8; Duc 24.1-12; Uan 20.1-10)

¹ Esus unësbon abentsec ushash abi chonoad-temaidëntsen abentsebidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mac-tada yacnuësh choquid Madia utsibëd isec choapac caondash. ² Choash isec tabadnubi nidaïd uëdëquiampac caondash. Adnubien Nuquin Papan

abi yacnoshon uaid mayan bēda abucuēsh budtanquin cuēnote dapa bētashaid shēcbempac caondash. Adtanec cuēnoten tsadtopac caondash. ³ Mayan bēda yec abu bed-bedquiacbimboec ushēmboshē bēchamauanquiec icpac caondash. Aton dashcute adquiobidi bēchish nibēdquiec ushumboshē icpac caondash. ⁴ Adec dacuēdampambo icsho isashien unēsaid cudasquido sondado dacuēdtanec uēdēquec tantiadampambo yec padishbudnepac caondash abitedi.

⁵ Adnubien mayan bēdan Madia chedo chuipac caondash. —Dacuēdenda. Cuesten dectanquin unēs uaboed Esus isnuec mibi tabadec. ⁶ Nibēdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuioapac caondash. ⁷ —Mimbi isboed Esusbēdicboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auēshquiobi chidobo dacuēdboedi cuishonquec titinquier nec nidanepac caondash.

⁹ Titinquier nec nidaneshobien Esusēnquiotsen bēquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danēshēn sebudquin taē uidēn uapac caondash. ¹⁰ Adoquien Esusēn: —Dacuēdenda. Con utsibo ēbēd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuencho isun sondadon muauaid

¹¹ Madia nidnubien Esus nauedaïd isquido sondado abi chomeboedo isadaïdbo chuiquido chiec chopac caondash. Mayan bëda chonoc Esus uincuemoed chuituidpac caondash.

¹² Adoaquien isadaïdbo chuiquidon aton chuiquid utsibobëd onqeshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —qeshun piucquid dadpenquo menepac caondash. ¹³ —Mimbi isboedquo chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun ¹⁵ piucquid meniac bedanec nidec isadaïdbo chuiquidon chiacpadec muapac caondash sondado. Adembidi nëbi isadaïdbo dadpenshun: “Esus ampiac,” quequin chuioaic.

Ëbi chuibeneta, quequin Esusën chiaïd

(Mad 16.14-18; Duc 24.36-49; Uan 20.19-23)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac. ¹⁷ Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —qeshun danëshën seabudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec.

Abitedishun Icbombo icquin abitedimbo namequidquo nebique. Mibitsen namenu.
¹⁹ Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta.
²⁰ Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi — quepondash Esus ënquimbi chiec.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

446da786-5bd1-5ffa-85e2-9eff4052cf8b